



Wantok



Namba 1879 Wan Wik Ogas 19 - 25, 2010

Niuspepa Bilong Yumi Oi PNG Stret! *K1 tasol*

SIMBU SALIM SPAK BRUS BILONG STRETIM SINDAUN - Pes 3

INSAIT: 40 yia Anivesari Spesol bilong Wantok Niuspepa!!

Rausim ol haus sik sevis fi long ol mama



'PUKPUK KAIKAIM EM': Taim Nesenel Helt Dipatmen i lonsim Nesenel Helt Plen bilong 2011 i go inap 2020, kain kain tumbuna singsing na danis i kamap. Ol lain Sepik i bin kam trom oi lek tu, na ol i kisim wanpela wantok bilong ol i kam. Em pukpuk ya. Em namba wan taim long lukim pukpuk i sanap long tupela lek na danis i go kam. Tru tumas, ol pukpuk i nogut ya!
Poto: James Kila

Veronica Hatutasi i raitim

OL HAUS sik, helt senta na etpos i mas rausim ol sevis fi ol i save sasim long ol mama olsem wanpela rot long daunim mak long ol bel na karim mama na ol liklik pikinini i dai.

Dokta Lahui Geita em Teknikel Etvaise bilong Matenel Helt seksen wataim Nesenel Helt Dipatmen i tok aste long taim bilong lonsim "Matenel Task Fos" ripot long Kraun Plaza Hotel (Crown Plaza) long Mosbi aste.

Lonsing i bin kamap insait long wanpela wik Nesenel Helt Konpres (NHC) bai i pinis tumora, we moa long 300 helt woklain, ol dokta, nes, provinsel na nesenel helt etministreta i stap long en.

Dokta Lahui i wanpela long ol 10-pela memba bilong Matenel Task Fos komiti we Helt Dipatmen na ol developmen patna i bin kamapim bihainim daireksen o stia bilong Helt Minista Sasa Zibe taim em i kisim wok olsem minister long yia 2008.

As tingting bilong komiti em long painimaut watpo helt sevis long kantri i wok long bagarap, ol sevis i no ron gut na bikpela samting stret em ,watpo na planti liklik pikinini long 0 inap long 5-pela krismas na ol mama i laik karim pikinini i wok long dai.

■ I go long Pes 4

Kisim Motorola WX181!



Baim Niupela Moto WX181. I kam wantaim FM redio na planti moa!

Olgeta fon igat fri kredit na frim sim kad stap insait pinis..

Digicel

Bikpela, Storpela moa Netwok bilong PNG.

Digicel Tems na Kondisen i stap.



Rait abus!



Minista Zibe laikim medikol wokman meri soim gutpela piksa

.....maski long karim 'bia-bel', kaikai buai na simuk tumas

James Kila i raitim

OL MEDIKAL o helt wokmanmeri insait long Papua Niugini mas soim gutpela eksampel o piksa long ol narapela manmeri wantaim gutpela pasin long sait long sait long lukautim helt blong ol.

Laipstail we i lukim medikal o helt wokman meri i karim bikpela 'bia bel' o kaikai buai na tit ros na simuk tumas em i no gutpela piksa long ol narapela manmeri long pablik.

Dispela em bikpela toktok Minista bilong Helt na HIV AIDS, Sasa Zibe i bin givim long taim em i opim 20th Nesenel Helt Konfrens ong Mosbi long Mande long dispela wik. Dispela konfrens i go wantaim wok plen bilong Nesenel Helt Dipatmen long karimaut Nesenel Helt Plen 2011 igo 2020, we ol i bin lonsim long Tunde.

Minista Zibe i tok 'Laipstail sik' namel long ol wokman meri bilong helt mas go daun bikos ol mas soim gutpela piksa long ol narapela lain long bihainim long stap gut na helti.

Minista Zibe i tok olsem dispela nupela Nesenel Helt Plen i soim ples klia tru olsem i gat planti samting long wokim long bringim kamap gut helt bilong ol manmeri na pikinini insait long PNG i kamap gut.

Mista Zibe i tok olsem ol rekot o mak insait long helt i soim olsem i gat planti samting i stap long mekim long mekim kamap



Seketeri bilong Helt, Dokta Clement Malau (Iephan), Helt Minista, Sasa Zibe wantaim Deputi Praim Minista Don Polye I soim piksa bilong nupela Nesinol Helt Plen 2011-2020 long taim bilong lonsing long Se John Guise Stadium long Mosbi long Tunde. Foto: James Kila

gut ol dispela rekot nogut long helt insait long PNG. Olsem na ol helt wokman meri i mas wok strong long bringim sevis i go long ol manmeri insait viles na haus-lain komyuniti insait long kantri.

Em i tokaut olsem ol mak o rekot long sait bilong mama i karim pikinini na indai na tu ol mama i dai i no kamap gut yet. Olsem na bikpela wok tru i mas kamap long kamapim gut ol wok long stretim helt bilong ol mama long taim ol i redi long karim pikinini na tu long sait bilong bebi i kamap.

Em i tok tu olsem ol sik olsem

Malaria na sik TB em nogat gutpela kontrol i kamap long en yet. Moa long en tu ol laipstail sik i wok long kamap yet namel long ol bikpela wokman meri insait long kantri.

Minista Zibe i tok ol nupela kain sik i wok long kam insait long kantri bilong yumi olsem HIV/AIDs na influenza H1N1, Kolera. Pastaim ol dispela sik i no save kamap long kantri

bilong yumi.

Tasol Mista Zibe i tok strong olsem ol sik we i stap pastaim long PNG i wok long givim bikpela hatwok yet na planti wok long stretim ol dispela wik i no pinis yet.

Minista Zibe i tok olsem ol haus sik na tu ol eid pos long ol ples na haus-lain long kantri i no inap long kontrolim ol dispela sik taim ol i kamap bikpela.

Em i tok wantaim dispela nupela Nesinol Helt Plen nau Gavman na Nesenel Helt Dipatmen i kamap wantaim, yumi olgeta i mas wok bung wantaim long stretim ol rot long helpim ol manmeri na pikinini long kantri long kisim marasin na tu stretim ol yet long kamap gut.

Em i tok dispela nupela Nesenel Helt Plen 2011-2020 em simpol plen tasol we planti lain i helpim long putim wantaim. Dispela plen i kamap bihain long gutpela wok bung namel long provinsal na distrik level wok lain na tu ol lain long ol sekta patna olsem Sios na pravit sekta. Dispela plen we olgeta lain i putim wantaim bai stap olsem was long olgeta dispela lain i ken mekim gutpela bisnis wok wantaim.

Em i tok dispela nupela Nesenel Helt Plen i go wantaim ol lukuluk na wok plen we i bihaim 7-pela bikpela wok mak o pila bilong PNG Visin 2050 bilong Gavman.

Mista Zibe i tokaut tu olsem dispela nupela Nesenel Helt Plen i go wantaim PNG Developmen Stratejik Plen 2011-2030 na i go gut stret long sait bilong developmen wok bihainim wanem samting Gavman bilong PNG i laik lukim i kamap.

NDB laikim K100 milion Gavman sapot long kirapim wok: Maru

Paul Zuvani i raitim

NESENEL Developmen Bank (NDB) i laikim moa long K100 milion long wan wan yia long karimaut gut wok bilong em.

Nau yet gavman i save gat K20 milion tasol long Mani Plen bilong em na dispela i no inap.

Dispela i tok bilong Menesing Dairekta bilong benk Richard Maru long taim benk i givim K9.4 milion long tripela lokol bisnis grup long hetopis bilong benk long Waigani long aste Trinde.

Em i tok benk i redi long helpim ol manmeri long kirapim wok bisnis bilong ol tasol em i no inap helpim ol bikos i nogat inap mani.

"Sapos gavman i mas givim givim K100 milion o K200 milion orait em i mas givim.

"Dispela K20 milion we em i givim i no save helpim benk long karimaut wok bilong em olsem em i mas," Mista Maru i tok.

Em i tok planti manmeri i gat gutpela as na inap long kisim helpim

tasol benk i no inap long givim helpim long wanem em i nogat inap mani.

Em i tok ol komasel benk i save lukluk long ol bikpela bisnis manmeri na i no save helpim ol turangu liklik manmeri long dinau mani bikos ol i nogat bilip long ol.

Long dispela as NDB i stap bilong helpim dispela ol liklik lain manmeri.

NDB i gat planti wok olsem go raun long wan wan komyuniti na skulim ol manmeri long kirapim wok bisnis, rot bilong ronim bisnis na rot bilong kisim helpim long statim bisnis.

Long tripela bisnis grup Akami Wel Pam klostu long Kimbe, Wes Nu Britan Provins i kisim olsem K5,323,798 long kirapim wok long 200 hekta wel pam estet, Ikkipmen Plent Haia long Madang Provins i kisim olsem K2,500,000 long developim Madang Bekari na KK & Sons bilong Mt. Hagen, Westen Hailans Provins i kisim olsem K1,615,900 long baim ol ka

na karim ol kago long Hailans Haiwe.

Long taim em i givim sek mani Maru i tok benk i stat long kisim planti askim long ol midium (namel) sais lokol kampani long kisim helpim long benk.

Dispela long wanem NDB i askim ol liklik manmeri long kisim helpim long Maikrofainens Benk long kisim dinau mani na kamapim bisnis sapos ol i nogat mani stret olsem sid o kapitel mani bilong statim bisnis.

Long bekim maus bilong Maru Albert Camilus (Akami Wel Pam), Dokta Thomas Kange (Ikuimen Plent Haia), na Bafike Roika (KK & Sons) i amamas na tok tenk yu long Maru na NDB long luksave bilong ol i go long ol tripela bisnis grup.

Ol i tok ol bai mekim olgeta samting gut long kamapim wok long helpim ol i kisim.

Stap long lukim dispela bung em Memba bilong Nuku na Minista bilong Hausing Andrew Kumbakor

OXFORD, TOK PISIN INGLIS DIKSENERI

Katim, na pulimapim oda fom daunbila na salim i kam long Wantok Niuspepa sapos yu laik daim dispela Oxford Papua Niugini Dikseneri (Dictionary) we Wantok na Chifort i wok bung wanlain long kamapim. Dispela buk i ken helpim yu lanem Tok Pisin i go long Inglis, o Inglis i go long Tok Pisin. Harap na kisim wanpela bilong ol dispela gutpela buk we inap strongim Tok Pisin bilong yu.

ORDER FORM

TITLE	QTY	PRICE	OTI	REMARK
PGC Tok Pisin English Dictionary	9781493511729	K22.00		

Name: _____
 Address: _____
 City: _____
 State: _____
 Zip: _____
 Phone: _____
 Email: _____

Order to be paid by: _____
 Bank Name: _____
 Account Number: _____
 Branch: _____
 City: _____

FAX BACK TO: (675) 325 2579
 Email: _____

Sen John's bai stopim wok

Veronica Hatutasi i raitim

ODA bilong Sen John ogenaiesen we i save helpim gut tru ol manmeri insait long Mosbi siti long taim bilong bikpela sik na birua bai stopim o pasim ol sevis bilong em bikos em i nogat mani long skruim ol wok na tu, peim ol woklain bilong em.

Sif Operesens na Koporet Sevis opisa, Tim Wieland long aste apinun i tok ogenaiesen bai stop long mekim ol wok bipo long pinis bilong dispela wik.

Insait long las tripela wik na i kam inap aste, ol boslain bilong Sen John's i wok long toktok wantaim opis bilong praim minista, Helt Dipatmen na Fainens na Treseri long givim ol K1.5 milion bilong karimaut ol wok na peim ol woklain bilong em inap long pinis bilong dispela yia. Tasol Sen John's i no kisim dispela mani yet.

Ogenaiesen we i stap wok long PNG long 43 krismas nau i save kisim mani long gavman long karimaut ol wok long tripela taim insait long wanpela yia.

Oda bilong Sen John ogenaiesen em dispela Non Gavman Ogenaiesen (NGO) we i save givim ol helpim long sevim ol manmeri i kisim bikpela birua na lusim bikpela blut, ol mama i karim pikinini na i hat long go long haus sik, ol manmeri na pikinini we sik i kisim ol nogut tru



WOKMAN NO AMAMAS: Sen John's bosman Douglas Kelso i toktok long ol Ambalens Sevis woklain long wanpela bung long hetkwata bilong ol long Renbo. *Poto: Nicky Bernard*

na klostu ol i bungim dai na ol kain sik olsem.

Ol sevis we Oda bilong Sen John i givim long siti na kantri em long: Ambalens Sevis, Blut Beng, Sen John's Skul bilong ol Aipas lain na stat long yia 2007, Helt sevis.

Planti long yumi i save long Ambalens Sevis bikos em i save ron mekim wok long 24 awa long Mosbi siti. Na taim ol birua bilong rot i kamap, ambalens em i go paslain long sevim man na kisim i go kwiktaim long haus sik. Em i gat 11 ambalens i save ron mekim wok long NCD na Sentrel provins. 7-pela i bilong mekim ol

spesel wok na 4-pela i mekim ol jenerel wok. Tripela i save stap long rot olgeta taim.

Long sait bilong helt sevis, Sen John's i bin go insait long dispela eria long 2007 taim nesenel gavman i strongim ol NGO na Sios long go insait long wok patna wantaim gavman long kisim helt na edukesen sevis i go aut long pipel. Na nau, Gordons Klinik na Gerehu Haus sik em tupela helt institusen we Sen John's i papa long ol.

Ogenaiesen i save helpim lukautim Tokarara klinik long NCD. Na tu, Gaire na Tubusereia klinik long Sentrel provins.

Ogenaiesen i gat samtig olsem 400 woklain. Ambalens Sevis i gat 70 woklain long komyunikesen seksen, woksop, ol ambalens opisa, kru na draiva husat i save wok long 24 awa.

Bikos Sen John's i no kisim dispela K1.5 milion, em i no inap long karimaut olgeta wok olsem pastaim. Na long las Fraide, bosman bilong ogenaiesen em Douglas Kelso i bin wokim disisen long katim daun sampela sevis na ol wok manmeri bilong em.

Olsem na wanpela ambalens yunit na ol woklain em ol i stopim long wok inap ogenaiesen i kisim mani long gavman. Em i stopim tu ol woklain bilong em long mak bilong 30, long Gordons klinik tasol 170 woklain bilong em long Gerehu i wok i stap yet wantaim 30 woklain bilong gavman.

Long dispela wik Mande, samtig olsem 60 Ambalens Sevis woklain i no amamas long disisen we Mista Kelso i mekim long stopim wanpela ambalens yunit long wok na ol bin holim wanpela bung long hetopis bilong ol long Renbo, Gerehu.

Ol bin tok i no gutpela long bisman na menesmen i rausim sampela bilong ol long wok bikos ol i bilip olsem gavman bai i givim yet mani na stretim ol.

Ol bin tok maski wanem kain hevi ol i stap long em, ol woklain

i save mekim sakrifais na skruim yet wok. Na ol i no wanbel long Mista Kelso na menesmen i rausim sampela bilong ol long wok.

Mista Kelso i bin tokim ol woklain long stap wanbel na em na lain bilong em bai skruim ol toktok wantaim opis bilong praim minista, helt sekreteri, Fainens na Treseri long givim ol dispela K1.5 milion na em bai stretim ol. Na wok operesen bilong ogenaiesen i ken go het.

Ol woklain i bin tok tu olsem hevi long ol i no save kisim pe hariap i save kamap planti taim we ol i save kisim potnait pe wanpela wik bihain.

Mista Wieland i tok piul i save kaikaim bikpela mani, Dispela em piul ol i save yusim long olgeta wok ka na ino ol ambalens tasol. Insait long wanpela mun, ogenaiesen i save yusim samtig olsem K30,000 long karimaut ol wok bilong em.

Em i tok nau taim hevi long mani sot, ogenaiesen i stopim ol ron long kisim ma lusim ol woklain i go na i kam long wok. Tasol ol lain i wok long nait em kar i wok long kisimn na lusim ol long wok na haus.

Mista Wieland i tok ol woklain i no amamas na em i bilip olsem ogenaiesen bai stopim ol wok na operesen bilong em tumora sapos i nogat mani na i nogat wokman.

Simbu salim spak brus bilong stretim sindaun

Michael Novingu i raitim

MASKI ol gavman ejensi, NGO na sios i karimaut awenes long stopim pasin bilong salim spak brus, long Kamkumung Maket long Lae, ol i salim yet spak brus i stap.

Wanpela yangpela man, John Dege, bilong Simbu, i tokim *Wantok Niuspepa* olsem em i no laik bilong em long salim spak brus, tasol em i mas mekim.

"Mi salim spak brus long kisim mani long lukautim sin-

daun bilong mi," John i tok.

Em i tok moa olsem laip i hat long stap long siti, na dispela em i isi rot long kisim mani long helpim em.

"Mi traim long painim wok, tasol planti pasin wantok sistem i stap, na mi no inap kisim wok. Gavman i laik traim long daunim raskol pasin, orait, ol gavman lain tu i mas stopim pasin korapsen long ol yet. Bihain ol i karimaut awenes long komyuniti long bihainim," Dege i tok.

John i tok planti pasin korapsen i stap long gavman na i lukim nogat wanpela sevis i go long ol manmeri long ol

rurel distrik na ol i kisim taim nogut.

Em i tok long daunim raskol pasin, gavman i mas kirapim wok developmen, long inapim laik bilong ol manmeri, bai ol i ken stretim gut sindaun bilong ol. Em nau bai ol i no inap mekim kain pasin olsem we i brukim loa.

Wantok Niuspepa i stap long Kamkumung maket na i lukim ol i salim spak brus olsem ol i salim kaikai. *Wantok Niuspepa* i traim long kisim toktok bilong Lae Metropolitan Polis Komanda, tasol em i no inap long toktok wantaim em.

PNG's Nambawan Mackerel

Besta
FINEST QUALITY



It's Better, It's Besta!

Misin haus i go pablik

Kiki Kavana i raitim

LAIAGAP em liklik sab stesen na sapos yu ron long rot, em ples we i sanap tupela awa long ples we bikpela main bilong Hailans, Pogera stap long en.

Hait insait long Laiagap long maunten bilong Enga Provins sanap wanpela haus malolo.

Nem bilong haus maololo em Mamare Guest Haus na em i ron aninit long lukaut bilong Hailens Baibel Trening Senta (HBTC), bikpela senta bilong Kristen Apostolik Misin.

Na man husat gat bikpela wok long lukautim olgeta haus na painim rot long autim toksave bilong ron bilong haus malolo em Simon Kunamen.

“Dispela tingting long tanim ol olupela misin haus i go long haus malolo i kamap taim mipela pilim olsem i gat nid long mekim mani long helpim wok long misen.

Long ol pipel bilong Laiagap, dispela em nupela tingting we planti i no save long ronim na lukautim haus malolo na ol no save tu long helpim kain tingting olsem ken kamapim, olsem strongim wok turis (tourism).

Tasol bikpela samting em long autim gut nius bilong buk baibel taim ol turis kam slip long haus malolo bilong mipela,” Mista Kunamen tok.

Mista Kunamen i kism tok orait long bosim ol haus malolo bikos long save em gat long wok long ol bikpela hotel long

kantri bihain em kism Turisim na Hospitaliti setifiket bilong en long Lae Teknikel Kolis long 1997.

HBTC i kirap long 1960s long ol Apolistik Misineri na taim ol misinari i lusim Laiagap bihain long independens bilong Papua Niugini, ol asples i nogat tingting long painim rot long mekim mani long lukautim operesen bilong misin.

Long yia i go pinis, edministresen bilong HBTC i luksave olsem bringim mani insait long misin i bikpela samting long skul na ol i tok oraitim kamap bilong Laiagap Distrik Pater Opis. Na Bod ov Menesmen i tanim ol olupela misin haus go long haus malolo.

Em i prosek we ol lukim long daunim lo na oda hevi insait long Laiagap we i gat 160,000 na moa man na meri na tu, long strongim kalsa bilong Laiagap long taim bihain.

“Long dispela taim, mi wanpela tasol husat i klinim ol haus malolo, kuk, wasim plet, was man bilong ol turis na ol kain samting olsem.

“Tasol mi no les long wokim olgeta wok. Mi laikim stret na mi laik tok maski wanem stori pablik i harim long Laiagap, mi laikim ol man meri long kam lukim ol yet long ol gutpela samting na pipel husat i stap long hia,” Mista Kunamen tok.

Long save moa long ret na polisi bilong Mamare Guest Haus, yu ken ringim Simon Kunamen long mobail 72304131.

Rausim ol hausik sevis fi bilong mama

■ i kam longpes 1

Wok bilong komiti em long painim ol as na painim ol rot we helt sevis i ken kamap gut na senisim piksa nogut we PNG i gat skelim wantaim ol kantri long Esia na Pasifik rijen.

Wantaim 1,300 mama i karim pikinini i dai olgeta yia na namel long 300 na 733 pikinini i skelim wantaim 100,000 pikinini krismas bilong ol i daunbilo long 5-pela yia i save dai, PNG i sanap long mak nogut skelim wantaim ol kantri long Esia na Pasifik rijen. PNG i sanap long namba tu (2) bihain long Afganistan olsem namba tu top kantri long rijen we bikpela mak bilong ol mama na pikinini in save dai long en.

Tripela dokta i bin givim ol ripot bilong ol em Dokta Ligo Augerea em Sif Obstretiks na dokta bilong ol mama, Dokta Lahui Geita em Teknikel Etrvaisa long eria bilong Matanel Helt na Deputi Helt Sekreteri Dokta Paisan Dakulala.

Dokta Geita i tok piksa long mak bilong ol pikinini i na mama i dai i wok long go nogut olgeta yia na dispela i mak long PNG i putim “imejensi rispons”, wankain tasol olsem em i wokim long sik H1N1 o sik long kus bilong pik na kolera.

“Yumi mas wokim samting hariap long daunim go antap long dispela mak nogut. Yumi mas putim moa mani na pipel long wok long kamapim gut dispela eria,” Dokta Geita i tok.

Long daunim mak bilong ol bel mama na ol liklik bebi i dai na tu long apim Midium Tem Developmen Gols (MTDG) we Yunaitet

Nesens i makim long samting olsem 180 kantri long wol we PNG i wanpela long ol, Dokta Geita i wokim dispela toktok.

“Ol famili sevis ol mama i kism long ol haus sik, helt senta na etpos i mas fri. Ol haus sik, helt senta na etpos i noken sasim sevis fi long ol mama i go long klinik bilong ol bel mama (ante-netol), famili plening na taim ol i go karim bebi na slip long haus sik. Dispela em long nesanel, provinsel na distrik level. Noken mas sasim ol dispela fi stret. Yumi mas wokim olgeta samting long inapim ol MTDG em detlain bilong en em long 5-pela yia tasol long 2015.

Dokta Geita i tok bikpela samting nau em long gavman, praivet sekta, ol developmen patna na ol manmeri long PNG bilong wok wantaim long kamapim gutpela senis na piksa long helt sekta na helt sevis long kantri.

Long sait bilong ol sevis fi ol provinsel haus sik na helt senta i save sasim ol wanwan mak long fi namel long K10 na K20.

Wanpela helt woka long konprens hap Wantok i kism ol toktok bilong em i tok dispela toktok em ol i bin wokim sampela yia i go pinis, tasol ol haus sik, helt senta na etpos i no bihainim bikos em i “laip blut” bilong ol.

“Em i hat long ol haus sik, helt senta na etpos long go hetim dispela lo bikos ol i laikim mani long baim ol samting bilong lukautim ol haus sik. Helt Dipatmen i no save katim inap mani long mekim ol samting olsem baim ol toilet papa, sop na ol narapela samting moa olsem,” helt opisa i tok.

Ol Morobe provinsel minista tok promis

Bustin Anzu i raitim

OLPELA primia bilong Morobe provins Joshua Hagai i mekim rot bilong em i go bek gen long Tutumang o Morobe Provinsel Asembli bihain long lusim wok politiks longpela taim.

Dispela taim, em i go bek olsem wanpela kaunsil presiden bilong Salamaua Lokol Level Gavman (LLG) na kism wok olsem siaman bilong Fiseris na em i mekim tok promis bilong em long aste (Trinde) long Morobe stet haus.

Hagai em i wanpela bilong ol 23 provinsel minista we ol i sainim pepa na mekim tok promis bilong ol long mekim wok bilong ol, bihain long Gavana Luther Wenge i toksave long potfolio bilong ol las wik Fonde.

Long dispela taim, em i givim ol dispela wok siaman, em i bin tokim ol olsem ol mas mekim wok na noken kamap olsem ol kauboi na raun nating. Em i tok sapos ol i no bihainim olsem ol minista, orait, em bai rausim ol long mekim wok bilong ol na makim narapela.

Em i bin tokim ol olsem ol lidas mas soim kala na pasin bilong ol olsem ol lida we ol pipol insait long komyuniti mas respektim ol na i no man nating.

Em i tok tu long ol presiden husat i no holim o kism wok long noken bel hevi long wanem, ol bai kism mani bilong ol paslain long ol narapela ministas we ol i bin makim.

Wenge i tok Tutumang em wanpela strongpela bodi bilong wokim disisen insait long provins, bihain tasol long Nesanel Gavman Palamen.

Gavana i rausim ol siamansip long ol Nesanel Memba bilong Palamen

na givim i go long ol Kaunsil Presiden tasol Benson Suwang tasol i holim wok bilong em olsem man bai go pas long gavman bisnis. Em tu em siaman bilong lens, gavman propeti na invesmen.

Gavana yet i kism siaman bilong Fainens, lika laisensing na ol manmeri wantaim disabiliti na namba tu bilong em na Presiden bilong Garaina Lokol Level Gavman Morokoi Gaiwata i kism sia bilong plening na human risos.

Lae siti Meya James Khay i kism potfolio bilong komes na indastri taim wanwok bilong em long Finschaffen (eben) Manaseh Laima bai lukautim Lokol Level Gavman.

Ol narapela em: Dac Viso (Hube) yut, Dick Iwong (Borum/Kuat) lo na Jastis,

David Lulu (Selepet) helt, Bini Hefua (Komba) trenspot, Aune Loto (Wasu) bounderi, Mathias Philip (Mumeng) maining, John Yawa (Wau Rural) setelmen na ebenaisesin,

Waka Daimon (Watut) kalsa, Steven Sep (Buang) petroleum na ges,

Jack Kauc (Labuta) rilijen na meri afeas,

Kopen Waibang (Nabak) edukesen,

Charlie Koike (Erap-Wain) Woks, Thompson Nalingiso (Kome) turisim,

Yawasing Wawaingo (Kapau) spots,

Kitowe Mumusiong Konsevesin, Steven Mambo (Leron/Wantoat) agrikalsa, na

Peter Mamus (Wampar) forestri.

BISHOP BROTHERS
everything for industry...

Lukaut long ol 'Fols Profet' i mekim promis long gutpela bihain taim bilong PNG

LONG dispela stori kona bilong yumi las wik, yumi bin pinis wantaim dispela hap tok:

"Bilip bilong mipela i olsem sapos yumi no painim bikpela hevi long kantri, bai yumi mekim rot bilong lukim kamap bilong wanpela dikteta. Na sapos dispela i kamap, yumi mas prea olsem em bai wanpela gutpela dikteta na i no narapela.

Dispela em i histori we i kamap pinis long Afrika na Not na Saut Amerika.

Mipela i gat planti ol kendidet bilong dikteta i stap pinis long politiks bilong yumi husat i wok long tromoi mani go kam na apim nem bilong ol long niuspepa, TV na redio i stap."

Long lukluk bilong mipela, mipela no nap lukim rot i go aut lusim dispela pasin bilong braiberi na korapsen long kantri. Bikos em i go insait pinis long olgeta hap kona bilong PNG komyuniti, na nau em i kamap olsem laipstail bilong yumi. Tru tumas, nau em i wanpela malti milian kina bisnis.

Wantaim dispela kain braiberi na korapsen, em i save daunim tingting na bilip bilong ol pipel, we sapos em i go na i go yet, em bai ol pipel yet i nogat moa strong na maus bilong tokaut. Em nau bai ol pipel i pasim ai na lukluk tasol long painim kaikai bilong wan wan de tasol. Nau mipela i lukim dispela i kamap pinis wantaim Lidasip Koud na Envaironmen Ekt 2000. Rot bilong wok long Palamen tu em gavman i bagarapim pinis na nau i nogat moa fri tok pait long ol bikpela salens i



bungim kantri bilong yumi.

Ol samting i kamap long las palamen sindaun em i soim klia wanem samting bai kamap taim yu larim gavman i pilim olsem strong bilong em i winim strong bilong olgeta arapela lain. Em nau, taim gavman i strong moa yet, strong bilong pipel bai go daun, na bai go olsem inap ol pipel i les long wanem hevi ol i karim.

Isi isi, gavman i wok long pasim pipel long rot ol i ken bihainim long kisim luksave long ol hevi we gavman na ol bikpela bisnis i wok long mekim. Olsem na nau wokbung i stap namel long ol politisen long gavman na ol bikpela bisnis na i nogat moa demokrasi, fridom na rait bilong ol manmeri. Hap tok ol i save tromoi nau em: "Mi gat mendet bilong pipel long mekim samting long laik bilong mi."

Mipela i ting olsem pasin braiberi na korapsen bai stap hia olgeta. Em bai hat long rausim olgeta. Tasol mipela i luksave tu olsem i gat wanpela bikpela birua moa i stap sapos korapsen i strong moa long kantri.

Dispela birua em rausim bilong pasin bilong wankain luksave bihainim ol lo i stap pinis bilong stiaim yumi. Taim yu glasim gut, yu bai luksave

olsem dispela em i astingting bilong lo we i save holim strong palamen demokrasi bilong yumi aninit long wanpela konstitusen ol i raitim na stap.

Yes, i tru olsem ligel sistem bilong yumi i wok i stap, tasol dispela wankain luksave we ligel sistem i mas strongim, i no moa stap olsem na ol wok bilong skelim na bihainim lo na strongim lo i krangi liklik nau. Yes, i tru yumi wok bihainim stret lo ol i raitim, tasol yumi no moa bihainim spirit na astingting bilong lo we i givim ligel sistem dispela luksave olsem as bilip bilong stretpela pasin na tingting.

Olsem taim polis i givim wanpela waren bilong ares long wanpela biknem lida manmeri. Long stretpela rot, kriminal jastis sistem bai bihainim ron bilong em yet na polis bai go het na arestim dispela lida na kisim em i go long ai bilong kot bilong lo bai em i kisim sas. Dispela i save kamap long ol olupela demokrasi olsem Ingran, Australia na Nu Silan. Long dispela kain samting, ol lo kot long ol dispela kantri bai no inap long givim tok orait bilong stopim ol ares waren ol liklik o lowa kot i givim.

Dispela em i no stret, long tupela as: Namba wan, ol bikpela kot i mas luksave long nem na strong bilong ol lowa o liklik kot husat i givim ol waren bilong ares bihain long ol skelim kes bilong polis i kamap long ai bilong majistret. Namba tu, kriminal jastis sistem i mas bihainim ron bilong en, na i noken gat wanpela banis i kam long bikpela kot, inap kes, bihainim

ron bilong en, i go kamap long bikpela kot.

Tasol long dispela kantri, ol bikpela kot bai kalapim lain na stopim polis na ol liklik kot long mekim wok bilong ol.

Kes bilong kisim ristrening oda agensim Ombudsman Komisin em i narapela kes we ol bikpela kot i suvim het na pasim jurisdiksen o wok bilong Ombudsman Komisin.

We i gat lidasip hevi namel long lida na Komisin, nesenel kot i noken kam insait na givim tok orait agensim Komisin o Traibunel long mekim wok bilong ol aninit long konstitusen.

Dispela em mipela i tok long en taim mipela i tok olsem dispela sistem bilong skelim tok na bihainim lo i bagarap pinis long dispela kantri we mipela no inap long strongim lo bihainim stret spirit na asbilip bilong en.

Olsem na sapos lida i gat komplek agensim Komisin o Lidasip Traibunel, em i gat rait long go long bikpela kot long rausim disisen bilong Komisin, o Traibunel BIHAIN long ol dispela ol institusen o opis i kari-maut wok bilong ol long mekim wok painimaut, na BIHAIN long ol i bungim tingting bilong ol na tokaut long en, na I NO PAS-TAIM.

Ol lo enfosmen ejensi, na ol liklik kot i noken kisim banis long ol i mekim wok bilong ol. Ol bikpela kot tu i mas wetim kes long painim ol bihainim stret ron bilong en, pastaim long ol i givim tingting bilong ol. Long lukluk bilong mipela, ol bikpela kot i wok long wokabout long bris, pastaim long ol yet i lukim ol dispela ol bris. Ol i wok

bagarapim sistem bilong lo na wok bilong strongim lo long dispela kantri.

Long pinisim tok, mipela i tok olsem braiberi na korapsen long dispela kantri bai stap yet. Maski mipela i ken traim long rausim, bai yumi no inap.

Bikpela astingting bilong dispela tingting bilong mipela em bikos ol lain i stap long posisen we ol i ken senisim pasin, em ol yet tu i korap pinis, na bai ol i no inap long mekim samting bilong rausim dispela pasin nogut.

Ol dispela lain husat i mas mekim samting em ol lain i save kisim bikpela hap tru long pasin braiberi na korapsen ol yet na ol i stap insait tru long en.

Em nau yumi kamap long narapela step gen long dispela hevi. Mipela bai inap long askim ol dispela korap manmeri long lukluk long dispela pasin ol i mekim, na mekim stretpela samting. Mipela i ken askim ol long luksave olsem i nogat self rispek bilong husat manmeri i mekim pasin braiberi na korapsen na moa yet, i nogat pablik luksave long ol dispela pipel na ol famili bilong ol. Na taim ol i painim taim bilong dai, olgeta ol samting ol i kisim long pasin braiberi na korapsen bai no inap kisim ol i go long gutpela ples na taim. Na bai ol i no inap kisim olgeta ol dispela samting i go wantaim ol.

Mipela i pinisim dispela wik wantaim wanpela toktok bilong baibel: "Man bai painim gutpela taim olsem wanem, sapos em i kisim olgeta samting long wol, tasol em i lusim sol bilong em?"



Putim was long 40 Yias Anivesari bilong Wantok Niuspepa! Spesol Saplimen i kam klostu long dispela pepa bilong yumi ol PNG stret!



Beware of false prophets promising a brighter future for PNG

IN THIS column last week, our concluding paragraph was:

“Our hunch is that if we do not get into civil unrest of some magnitude in this country, then we are creating conditions for the rise of a dictator. If that happens, then let us pray it would be a benevolent dictator and not otherwise. This is the way history unfolded itself in Africa and the Americas. We already have likely candidates on the political scene busy spending public money and singing out daily praises for themselves in the local media.”

It is our view we cannot see a way out of the phenomenon of bribery and corruption in this country, largely because it has permeated the whole spectrum of the PNG society, so that it has now become a way of life in this country. In fact it is now a multi-million kina business.

Coupled with bribery and corruption, it is a further phenomenon whereby the system in place systematically undermines the will of the people so that in time, the people feel powerless, voiceless and that way, the people lost interest in what is happening in and around them, as they concentrate on looking for the next meal to place on the dining table. We have now seen what has happened to the Leadership Code and the Environmental Act 2000. Even the parliamentary process has been corrupted by the government so that there is no longer a free debate on issues of national importance.

The events of the last parliamentary session is a classic example of what happens when you allow a government to feel



invincible. The more powerful the government gets, the more vulnerable the people become so that given time, the people will simply accept any treatment dished out to them.

Slowly but systematically the government is depriving the people of the appropriate avenue to seek redress for any wrongs committed by the government and big businesses which can afford to generate huge funds for the government. Thus, the partnership is now between the politicians in government and big businesses and there is no room for democracy, freedom and individual rights of the ordinary people. The slogan now is: 'I have the mandate by the people to do as I please'.

It is our view that the phenomenon of bribery and corruption is here to stay. It is not possible to eradicate it. However, we are further of the view that a far more sinister case scenario is now unfolding in this country as a direct consequence of corruption.

And that is, corruption has caused a far bigger problem and that is the systematic destruction of the concept of fair play by observance of established rules in an impartial manner. When you look at it closer, you will realize that this is the core function of the rule of law which in turn, sustains our parliamentary democ-

cracy under a written constitution.

Yes, on a superficial level, the legal system in this country still functions daily but the concept of fairness that the legal system ought to sustain has long been corrupted so that issues of interpretation and application of the law including enforcement are not totally devoid of the spirit embodied in the legal and judicial system. Yes, we are enforcing the letter of the law, but not the spirit of the law which gives the legal system its sanctity or its moral foundation.

Take for instance, a case scenario where there is a police warrant of arrest for a prominent person. In the normal course of events, the criminal justice system should be allowed to take its course so that the police should proceed to arrest that person and bring him before the court of law to be dealt with. This is what happens in older democracies like England, Australia and New Zealand. In the normal course of events, the law courts in these countries will not grant orders stopping the police from performing their functions.

However, in this country, the superior courts like the National Court readily dish out court injunctions stopping the police from arresting people against whom the police have already obtained arrest warrants from the lower courts.

This is totally wrong for two reasons: Firstly, the superior courts must respect the integrity of the lower courts which have issued the warrants for arrest after consideration of the police case put before the Magistrate. Secondly, the criminal justice system must be allowed to take its

course without any interference from the superior court until the case, in its normal transition, reaches the superior court.

Unfortunately, in this country, the superior courts will jump the queue to stop the police and the lower courts from performing their routine functions.

The case of obtaining restraining orders against the Ombudsman Commission is another classic case of the superior courts interfering with the jurisdiction of the Ombudsman Commission. Where there is a leadership dispute between the leader and the Commission, the national court must not be allowed to grant injunctions against the Commission or the Tribunal from exercising their constitutional functions.

This is what we mean when we say that the whole system of interpretation and application of the law including enforcement have been corrupted in this country so that we are no longer enforcing the law within the spirit of the law.

Thus, if the leader has any complaints against the Commission or the Leadership Tribunal, then he has the right to go to the superior court to upset the decision of the Commission or the Tribunal AFTER these institutions have conducted their investigations and AFTER they have made their determinations known but NOT BEFORE. The law enforcement agencies, including the lower courts must not be stopped from their routine functions. The higher courts in turn must wait for the case to reach them in the normal course of events before they exercise their supervisory jurisdiction. In our

view, the superior courts of law are crossing bridges long before they even sight the bridges for themselves. They are corrupting the system of law and law enforcement in this country.

In conclusion, we say that bribery and corruption in this country is here to stay. Regardless of what effort we may put into the fight to control or even eliminate it, we will not succeed. The primary reason for our pessimism is that the people in positions which can make the difference are themselves corrupted so they are not likely to take any action against bribery and corruption. The very people who ought to take remedial action are the biggest beneficiaries of bribery and corruption themselves and they are the very people who are partaking in it.

This now takes us to the next level and that is on the moral plane. We can only call on these corrupt people to look at the phenomenon of bribery and corruption as a moral issue. We can only call on them to look deeply within and decide if they are doing the right thing. We can only plead for them to see that there is no self respect for anyone engaged in bribery and corruption and furthermore, there is no public respect for these people and their families. And ultimately, when it is time to die the fruits of bribery and corruption will not send these people to a happy life and neither will they take with them the proceeds of bribery and corruption.

We end with a biblical saying: “How does it profit a man if he gains the whole world but suffers the loss of his soul?”



Putim was long
40 Yias Anivesari
bilong Wantok Niuspepa
Spesol Saplimen
i kam klostu long dispela pepa bilong yumi ol PNG stret!

Pe bilong ol sios helt woklain i wok long kamap gutpela

Veronica Hatutasi i raitim

PE bilong ol manmeri i wok long ol haus sik, helt senta na etpos we ol sios i papa long en i gutpela moa nau skelim wantaim dispela ol bin save kisim long sampela yia i go pinis, opis bilong Sios Medikel Kaunsel (CMC) i tok.

Na tu, olgeta pe na alauwens long 2009 na dispela yia, 2010, em ol i stretim pinis.

Tasol opis i tok ol Sios Helt Sevis (CHS) woka i no kisim yet ol bekpe bilong ol bipo long 2009. Na i moabeta long ol atori i go pas long dispela i lukluk long en na stretim.

Opis i tok long planti yia stret, ol Sios Helt Woklain (CHW) i bin stap ausait long ol lo i karamapim ol Pablik Sekta woklain. Ol i no bin gat ol entaitelmen o gutpela pe na alauwens samting we ol pablik sekta woklain i save kisim.

"Mipela i bin pait hat long kamap long mak we mipela i stap nau long en, tasol ol CHW i no hap long Pablik Sevis sis-

tem yet," CMC opis i tok.

CMC opis i wokim ol dispela toktok long bekim sampela toktok we James Amuna, em Jenerel Sekreteri bilong PNG Komyuniti Helt Wokas Asosiesen, i mekim i no long taim i go pinis.

Mista Amuna i bin tok Sios Medikel Kaunsel na Sios Helt Sevis i rong long i no peim gut ol woklain bilong ol, Dispela em ol komyuniti helt woklain, ol nes na ol helt ekstensen opisa.

Em i bin tok ol helt woklain i wok aninit long medikel sevis em ol i kisim gutpela skul na trening. Na em i no gutpela long lukim ol bos bilong ol i no peim ol gut, glasim mak long pe wantaim ol gavman helt woklain.

Taim Mista Amuna i amamas long ol sios long gutpela wok ol i mekim long ol ples we gavman sevis i no save go long ol, em i tok dispela gutpela sevis ol i save bringim long ol komyuniti em ol woklain ol i kisim ausait long sios ministri i save mekim wok. Na planti taim, ol woklain ya i no kisim gutpela luksave o sampela

taim, ol i no save kisim pe long taim stret bilong em.

CMC opis i tok ol reit na gret we CHS i stap long ol woklain bilong em i wankain olsem ol gavman woklain. Tasol samting i narakain em, "ol i givim CHS Mid Poin o namel Mak long salari o pe straksa we Dipatmen bilong Pesenel Menesmen i givim olsem Anuel Beis Salari."

Opis i tok CHS i save kisim mani aninit long baset siling na long mak bilong wok mani i ron olsem wanem. Na mak ol i save katim long pe e mol i save skelim long hamas woklain ol i gat skelim wantaim baset na manimak ol i save kisim long wan wan yia.

Opis i tok ol i save wokim ol pe na salim i go long akaun bilong ol wan wan sios ejensi akaun long wan wan mun i go long BSP Kundu Pe sistem,

Opis i tok i no longpela taim i go pinis nau taim tingtign na lukluk long CHS i senis na ol i wok long kisim moa sapot. Na pe bilong ol tu i wok long kamap gutpela, maski i no stap long wankain mak

olsem ol gavman helt woklain.

"Mipela i laik kisim wankain mak long pe n a mipela i hop dispela bai kamap," CMS opis i tok.

Opis i tok ol i nogat kopi bilong MOA we Mista Amuna i toktok long en tasol dispela MOA we ol na Nesenel Dipatmen bilong Helt na gavman i wok long laik gat em ol i no wokim yet.

"Patnasip bilong mipela em i kam aninit lon g Ekt bilong Palamen, Na ol i bin kamapim Provinsel Gavman Ekt na MOA we ol sios i gat wantaim ol Provinsel Gavman," opis i toki.

Em i tok sapos Ekt bilong Palamen em i abrusim taim bilong em, Mista Amuna i gat poin long dispela.

Opis i tok moa olsem ol sios i seperet lon g ol pablik institusen na ol yet i papa long ol wan wan helt institusen bilong ol.

CHS i gat moa long 4,000 woklain na em i gutpela tingting long CHS i ken gat pe sistem yet bilong em, tasol em i ken kamapim planti hevi anin it long konsep peirol system, CMC opis i tok.

Nesenel Helt Plen bai stretim gut

James Kila i raitim

MENESMEN bilong Helt sistem long Papua Niugini i bruk bruk nabaut na bikpela hevi na salens tru i stap long stretim gut Helt sekta insait long kantri.

Sif Seketeri bilong Gavman, i tokaut long dispela long taim bilong opim Nesinol Helt Konfrens na tu long taim bilong lonsing bilong PNG Nesenel Helt Plen 2011-2020.

Mista Zurenuoc i tokaut olsem 3-pela level bilong gavman bilong yumi i stap olsem rot long bihainim tasol long wok long kamap insait long bringim sevises i go long ol pipel i no save kamap na planti manmeri i wok long bungim hevi yet. Olsem na yumi mas kamap wantaim gutpela tingting na painim gutpela rot long stretim hevi na bringim sevis i go long ol pipel insait long kantri.

Mista Zurenuoc i tok em tru olsem bikpela namba long ol pipel insait long kantri i no save kisim gutpela helt sevises na tu ol marasin i no save go long ol pipel husat i nidim tru marasin long stopim sik na ol narapela samting long sait bilong helt bilong ol.

Em i tok olsem Gavman i lukim dispela na i kamap wantaim plen long stretim dispela hevi we ol pipel i ken gat sans long kisim ol sevises.

Dispela nupela Nesinol Helt Plen 2011-2020 we bai lukautim na was long wok bilong Helt sekta insait long PNG.

Insait long 10-pela yia dispela plen bai stap em bai kos samting olsem K14.2 bil-

ion long karimaut wok long bringim sevises i go long helpim ol pipel insait long kantri. Dispela em wanpela bikpela investmen tru long kantri.

Bikpela toktok tru Mista Zurenuoc i tokaut em olsem planti ol pipel insait long PNG i no wok long kisim gutpela helt sevises. Olsem na olgeta sekta insait long Helt i mas wok bung wantaim long bringim sevises i go long helpim ol pipel.

Em i tok olsem Gavman i putim bikpela mak pinis long wanem rot em bai bihainim. Dispela dairektiv i kam wantaim Long-tem Developmen Strateji bilong 20-yia we i kam wantaim 40-Yia Visin.

Mista Zurenuoc i tok olsem PNG Visin 2050 i soim "Bikpela Laik bilong ol Pipel" long lukim kantri o nesen bilong yumi divelop insait long 40 yia.

"Mipela mas Smat, Gat Gutpela Tingting, Fea, Helti na stap insait long Hepi Sositai long yia 2050. Dispela em bikpela driman tru we i stap yet we ol lain papa bilong yumi husat i stap pastaim long Gavman i laik lukim PNG i kamap long dispela mak.

Narapela bikpela toktok Sif Seketeri, Mista Zurenuoc i tok em olsem moa pawa i mas go long ol provins long kantri long sait bilong Helt. Long dispela rot ol i ken bringim sevises i go long helpim ol lain long distrik na wod na tru bringim gutpela tingting long wanem rot dispela ol wok plen i ken helpim ol liklik manmeri long ples long sait bilong gutpela helt bilong ol wantaim pikinini bilong ol long nau na bihain taim.



MIPELA TU I GAT TOK: Ol skul pikinini long Nesenel Kapitel Distrik I bin pilaim bikpela pat long lonsing bilong PNG 2011-2020 Nesenel Helt Plen long Se John Guise Stadium long dispela wik Tunde, Hia em wanpela liklik sumatin pikinini meri i tokaut long gutpela samting we em i laikim bai dispela helt plen i givim long em na ol olgeta pikinini bilong dispela kantri. Foto: Nicky Bernard

Bai gat Katolik Kolis long UPNG

...Ol wok redi i go het nau

Veronica Hatutasi i raitim

WOK awenes i stat pinis long kisim sapot bilong ol 20 Daiosis long kantri long sapotim wanpela Katolik Sios Kolis long Yunivesiti bilong PNG (UPNG).

Long las wik Sande, wan wan Katolik sumatin long UPNG i bin toktok long ol perisina bilong wanwan long ol 14-pela peris insait long Pot Mosbi Katolik Asdaiosis bilong mekim klia dispela projek we bai kamap long UPNG, na givim sapot bilong ol.

As tingting bilong sanapim dispela sios kolis em i bilong kamapim gutpela ples we bai helpim ol sumatin i sindaun gut

na kisim gutpela stia long luksave long God na taim ol i kamap ol lida, ol i ken sanap strong long gutpela Kristen skul na bilip na mekim ol gutpela disisen long ol wok ol bai kisim taim ol i pinisim skul.

Sansela bilong Pot Mosbi Katolik Asdaiosis em Pater Rodrigo Campilan, i tok ol Katolik sumatin bilong UPNG yet i bin kamap wantaim dispela tingting long sanapim wanpela Katolik Kolis insait long yunivesiti long tripela yia na long las yia, nau i dai Ok-seleri bisop bilong Pot Mosbi Asdaiosis, Bisop Cherubim Dambui i bin lonsim o opim plen long dispela samting.

Pater Rodrigo i tok UPNG i givim pinis bikpela hap graun long mak bilong 4-pela hekta insait yet long yunivesiti graun long sait bilong UPNG Tenis kot long sanapim dispela Katolik Kolis.

"Dispela em i wanpela bikpela projek ol i bilip bai i pinis long yia 2015. Kolis bai i gat long en wanpela sios sapel o haus lotu bikpela inap long kisim 1,000 pipel, ol haus slip bilong ol sumatin man na meri long kisim namel long 800 na 1,000 pipel, ples bilong kaikai, ples bilong holim bung o konprens rum, laibreri, kompyuta leb, kentin na haus bilong pater," Pater Rodrigo i tok.

Em i tok ol i bilip olsem projek bai pinis long 2015 na ol lain i kam long Saut Pasifik Gems long Mosbi long dispela yia (2015) i ken slip long ol haus long kolis.

Planti taim yumi save wari tasol long akademik sait o mekim gut long ol skul sabjek na i no long gutpela pasin o luksave long God. Tasol kain kolis we i sanap long nem na piksa bilong sios bai redim ol sumatin long "Integrel human development" o developmen long olgeta eria bilong laip na sindaun bilong man.

UPNG sumatin husat i go pas long projek, Douglas Siminji i tok tingting long sanapim dispela

projek em i bihainim visen bilong yunivesiti long developim ol wok manmeri bilong dispela kantri.

Em i tok dispela kolis bai givim gutpela stia na trening long ol yangpela lida husat bai mekim ol gutpela disisen long daunim ol korap pasin we i wok long bagarapim kantri. Na bihainim gutpela pasin long mekim wok stret, yusim gut mani long mekim wok na nogat stil na giaman pasin i kamap.

Em i tok PNG i gat nem long i no harim tok na wokim bikhet pasin. Na i mas gat sistem i stap long wok wantaim ol sios long senisim ol pasin bilong yumi i kamap gutpela.

Skul tisa na ripota toktok long wok bilong em

Veronica Hatutasi i raitim

TAIM Wantok Niuspepa i makim 40 krismas bonde bilong em, wanpela skul tisa i amamas olsem em tu i hap bilong dispela niuspepa bilong ol asples pipel bilong PNG i ron mekim wok yet. Ian Kakarere husat nau i Deputi Prinsipel bilong Kiunga Sekonderi skul long Westen Provins i wanpela nius ripota ol i save kolim long stringa o frilens raita bikos em i no mekim fultaim wok olsem ripota, tasol em i save raitim nius long fri taim bilong em.

Ian i bin stat long raitim ol stori na salim i kam long Wantok Niuspepa na ol susa Inglis niuspepa olsem The Times of PNG, The Independent, Rugby News, Weekend Sports, PNG Business na New Nation long yia 1983. Dispela yia em i namba 27 yia lan i rait long Wantok i stap.

"Mi amamas tru long kontribuit long Wantok Niuspepa long helpim ol ples pipel na liklik manmeri i kisim save long ol samting i kamap long PNG na ovasis.

"Laik bilong mi long stat rait long niuspepa em long Ragbi Lig nius i save ron olsem sapliment long Wantok. Namba wan wok-sop em Word Pablising, em mama kampani bilong Wantok, i bin ranim long ol stringa bilong en em long 1985 long Loloata Ailan ausait long Mosbi siti. Mi bin sindaun long dispela wok-sop.

"Mi stat long raitim ol jenerel nius na Ragbi Lig nius. Ol i tokim mi olsem, mekim wok bilong yu pastaim na sapos yu gat taim, yu ken raitim ol stori long Wantok. Long dispela taim, mi bin wanpela junia tisa na mi gat planti fri



SEKIM LONG WANTOK: Long ol wan wan taim, sampela lain long PNG na ovasis i karamapim ol risets lain, ol sumatin na ol narapela lain i karimaut sampela wok i save kam sekim ol niuspela olsem Wantok, The Times of PNG na The Independent long kisim ol infomesen long helpim ol i mekim ol wok bilong ol. Poto I soim sampela fainol yia Literetsa sumatin bilong Yunivesiti bilong PNG i wokim asaimen pepa bilong ol long ol stori tumbuna bilong PNG i kam sekim Wantok Niuspepa long ol dispela stori. Sindaun wantaim ol sumatin sekim Wantok em leksera bilong ol, Dokta Bernard Minol. Poto: Nicky Bernard

taim. Na mi no save isi long salim ol stori i kam," lan i tok.

Stat yet long 1983 i kam long ol yia long 1990's na 2000, lan i save raitim planti stori i kam long Wantok na ol susa Inglis pepa bilong em.

"Nau mi kisim sinia wok olsem Deputi Prinsipel, mi gat planti wok na mi no save rait planti. Tasol sapos sampela samting i kamap long Westen provins, mi save ringim Edita na givim nem na telipon namba long husat em i ken toktok long en long kisim ol stori na putim long Wantok. Tasol sapos Edita i askim mi long kisim na raitim stori, mi save mekim. Mi save baim wanpela kopi bilong Wantok olgeta wik. Gutpela taim na wok bilong mi long Wantok em mi tingim

olsem aste tasol", lan i tok.

Sampela ol bikpela wok we lan i bin go kisim na raitim ol stori long ol na i stap pas long memori bilong em ol dispela.

"Go wantaim Yunaitet Nesens Hai Komisin bilong Refujis (UNHCR) long Wes Papua long yia 2000 long lusim ol namba wan Wes Papua manmeri na pikinini i go bek long asples bilong ol. Bikos gavman bilong Indonesia i senisim polisi long ol refuji, em bin orait long ol i go. Na mipela i bi lusim Westen provins long haf pas 9 long nait bihainim boda rot i go olsem long Jayapura.

"Narapela em long ron long helikopta long Morehead. Narapela em long taim bilong bikpela san (drought) long 1997 we mi

bin kalap long ami helikopta bilong Australia long sekim olgeta hap bilong Kiunga na Morehead. Long 1987 tu, mi kalap long helikopta long raun sekim Striklen Gos. Em i wanpela hatpela ples bikos long maunten, tasol mi amamas long mekim ol dispela wok na raitim ol stori long ol. Ol dispela stori i bin putim Kiunga long mep bilong PNG tu ya," lan i tok.

Mi tingim taim mi yet i kam stat wok wantaim Wantok Niuspepa, olgeta krismas skul malolo, lan i save kam wok long Wantok na ol narapela susa Inglis niuspepa. Na em i no save long go aut, kisim nius na raitim planti stori insait long wanpela de. Na long wik bilong ol tisa i mas stat wok, em i save go bek long wok bi-

long em long Westen provins. Na long sotpela taim em i go wok tisa long Wes Nu Briten provins.

Taim mi save lukim nem lan Kakarere, mi save ting olsem em i man Galp provins, tasol nogat. Papamama em ol misinari bilong Australia i bin wok long Galp na Westen provins. Tasol wanpela Galp provins famili i bin kisim em olsem pikinini bilong ol na em i kamap man PNG. Em i marit long Westen provins na i gat ol famili bilong em i stap.

"Mi amamas long tok olsem mi hap bilong Wantok na long namba 40 yia bonde bilong niuspepa, mi salim bikpela tok amamas bilong mi i go long kampani na ol lain i wok i stap nau wantaim niuspepa," lan i tok.

Kolom i helpim planti lain

Fr. Paul Liwun SVD i raitim

TAIM Wantok Niuspepa i makim 40 krismas, mi laik stori liklik long dispela kolom mi save raitim kamap long 8-pela yia nau.

Em long Toktok Nating na Stori Tasol.

Taim mi kisim askim long rait long dispela kolom long 2002, ol bin givim mi wanpela wik long tingting long en na tok-save sapos mi laik o nogat. Mi bin givim sampela tingting long en na mi tok yesa, bai mi traim. Na i kam inap nau, mi amamas olsem 8-pela krismas i go pinis, mi rait yet i stap na givim sampela gutpela skul long ol nara-pela insait long peris bilong mi, komyuniti na kantri.

Mi bin statim dispela kolom bilong mi long yia 2002. Mi bin raitim 120 stori long TOKTOK NATING na 142 stori long STORI TASOL. Olgeta stori bilong mi kam long laip na wok ekspiriens bilong mi, long wanem samting mi lukim na wokim, na sampela stori i kam



long buk o intanet mi bin ridim long en.

Planti manmeri long ples o long siti i save long Tok Pisin i ridim stori bilong mi. Sampela long Wewak ol i salim pas i kam na tok tenkyu long mi bikos, sampela stori na skul bilong TOKTOK NATING i bin helpim ol long skul na serim insait long komyuniti bilong ol. Wanpela Holi Spirit Sista (SSpS), em i wanpela nes. Em i bin amamas long stori bilong mi long taim mi go lukim wanpela man i gat sik AIDS long Erima peris. Em i bin yusim stori bilong mi long mekim wok awenes long manmeri long ples.

Long Westen Hailans, sampela i salim pas i kam na wokim komen olsem mi autim tok klia long sampela samting i save stap hait long sios na kantri bilong yumi. Bikos wanpela stori bilong mi i tasim hat bilong ol. Tasol ol i bin tokim mi long LUKAUT, bikos sampela stori bilong mi i olsem autim stret wanem samting i no stap stret long gavman bilong yumi na pasin nogut bilong ol Politisen na memba bilong palamen bilong yumi. Long dispela, mi bekim pas bilong ol olsem, "Mi no wari, bikos stori bilong mi em i bilong helpim yumi long tingting long pasin bilong yumi. Mi no poinim pinga long wanpela man. Sapos yu PILIM i sutim bel, em i mak olsem stori bilong mi i sutim bel bilong yu".

Sampela raskol i bin kam long haus bilong mi long taim mi stap long Erima yet. Mi askim ol, olsem wanem yupela i save long nem bilong mi? Ol i tok: "Mipela ridim stori na skul bilong yu long Wantok Niuspepa. Stori na skul bilong yu i

sutim bel bilong mipela yet. Olsem na mipela i kam long askim moa long spirituel gaidens o tok stia bilong yu. Bikos stori bilong yu i helpim mipela long lusim dispela pasin nogut bilong mipela, tasol mipela laikim moa stiatok bilong yu, olsem na mipela bai stap strong taim traim i kam bek gen".

Ol i bin lusim pasin raskol bilong ol na nau sampela i mekim wok sekyuriti, sampela i marit na painim wok long sapotim famili, wanpela i statim liklik bisnis bilong em long salim sigaret na nau em i gat wanpela liklik stua bilong em yet.

I gat gutpela rispons i bekim long olgeta hap we ol manmeri i save long Tok Pisin. Long Daru/ Kiunga na long Enga Provins, sampela Pater i amamas na tok tenkyu long mi bikos sampela stori na skul bilong mi ol i bin yusim long skulim manmeri bilong ples.

Long Madang plant i amamas long stori bilong mi. Tasol ol i no amamas long taitel mi

bin givim long en. Ol i tok: "Stori na skul bilong yu i no TOKTOK NATING. Em i gat bikpela mining na skul bilong em".

Olsem na long sampela yia i go pinis nau, mi bin givim nu-pela nem "STORI TASOL" long kolom bilong mi. Inap tude, mi bin raitim 142 aninit long taitel STORI TASOL.

Bai mi rait I go moa yet. Mi bilip olsem long wanpela de, mi bai bungim olgeta stori bilong mi i kamap olsem wanpela Buk. Tasol mi bai laikim sponsa long helpim mi. Hepi namba 40 Bonde Wantok!

Toksave: Fr Paul i bilong Flores Ailan long Indonesia. Ailan bilong em i stap klostu long Is Timor. Tenpela yia stat yet long 1998, em i bin peris pris bilong Sen Peter Sanel peris Erima long Nesanel Kapitel Distrik. Tasol long las mun, em i lusim Erima na nau em i go long nu-pela peris. Em long Sen Michael's peris long Hanu-abada. Tok Pisin i kilim em gut stret tasol ating nau, bai em i lainim Tok Motu o?

Mercy Works holim yut progrem long Goroka

Paulus Tali i raitim

WANPELA sios ogenaisesen long Goroka, Isten Hailans provins bai holim wanpela de program bilong ol yut long Nesanel Pak long Goroka taun tude.

Mercy Works bai holim dispela wanpela de program long makim Intanesenel Yut De.

Ol yut bai i kam long ol kain sios, komyuniti na haus na Mercy Works i welkamim olgeta yut lain i grup long go insait long dispela program.

Het tok bilong progrem bilong dispela de em, "Strongim gutpela wok bilong ol Yut, em i no isi".

Long dispela wik, ol yut lida bilong ol wan wan sios i wok hat long glasim ol wok olsem ol i mas redi gut long go hetim tude. Progren bai inap long tokaut long wanem kain laip ol yut bilong tude i stap long en, wanem ol hevi ol i bungim insait long komyuniti, haus na provins.

Long nau yet, planti yut o yangpela i nogat wok bai i


kam na harim ol gutpela toktok we i ken helpim ol long kamapim gutpela sindaun nau na long bihain taim.

Planti ol yut i pilim olsem gavman bilong tude i no luksave long hevi bilong ol yut nau na long Visen 2050. Ol i tok gavman i wok long toktok planti long politiks na i no lukluk long hevi tru bilong ol grasrut lain we moa hevi i stap.

I gat bilip olsem long program bilong tude, ol pablik sevan, ol Non Gavman Ogenaisesen na praivet sekta lain bai kamap long helpim painim rot we ol i ken givim ol tok stia long ol.

Lukautim gut laip bilong ol yangpela tude em i bikpela samting bikos planti yangpela tude i wok long dai long ol kain sik olsem long HIV/AIDS, kriminel na bikhet pasin, kisim ol spakbrus na moa.

Tupela meri i go pas long ogenaisesen Mercy Works long Goroka em long Sister Marianne Kolkia na Hawa Harry.



SIOS BILONG MAGNIFIKAT: Las wik Sande long Katolik Sios kalenda i bin Asamsen Sande we sios i makim Mama Maria i go long Heven. Long Gospel rit bilong dispela taim, Mama Maria i bin go lukim kasen susa na famili bilong em Elizabeth husat i lapun tasol i bel wantaim John Baptais. Na taim em i amamas lukim susa bilong em, Maria i bin tok sol bilong em i apim Bikpela bikos em i wokim ol bikpela samting long em. Olsem na dispela sios we ol i bildim gen antap long olupela wan long 1939 em ol i kolim long Sios bilong Magnifikat i sanap 7 kilomita longwe long Jerusalem. Dispela em ples bilong Santu Elizabeth na John Baptais. *Poto: Buk Holy Land*

Yunaitet Sios holim namba 43 Eben Rijen bung

SAPOTIM ol sios lida long strongim lidasip long karimaut ol wok misin em i wanpela bikpela samting we sinot o bikpela bung bilong Yunaitet Sios long PNG i toktok long em.

Yunaitet Sios long PNG i holim namba 43 Eben Rijnel bung bilong ol long Mosbi stat long las wik Trinde yet i kam inap long pinis bilong dispela wik. Ol lain i stap long bung i kam long Madang, Popondetta, Goroka, Wewak, Vanimo, Lae, Lorengau na Mosbi yet.

Long opim bung, Gavana Jenerel Se Paulias Matane i bin salensim ol sios lida long wok bung wantaim long senisim tingtign na pasin bilong ol pipel na ol i ken stap gut wantaim.

Em i tok Mama lo bilong PNG i tok em i wanpela Kristen kantri na ol pipel i mas bihainim Mama Lo long ol tok-tok na tingting bilong ol na tu, taim ol i mekim ol samting.

Em i askim sapos yumi bihainim pasin Kristen olsem i stap aninit long Mama Lo bilong yumi.

Stori bilong meri niusrum draiva

Veronica Hatutasi i raitim

TAIM Wantok Niuspepa i makim 40 kris-mas bilong em, Helen Singiat em wanpela yangpela meri i bin wok olsem niusrum draiva i laik stori liklik long wok bilong em.

Helen i save kisim ol ripota long hap we ol i gat wok long en long Mosbi siti na kisim ol bek taim wok bilong ol i pinis, i laik stori liklik long wok na taim bilong em wantaim Wantok.

Helen bilong Kairuru Ailan long Is Sepik em i wanpela naispela yangpela meri i bin wok olsem Word Pablisng Kampani niusrum draiva long tripela mun, stat long Septemba na pinis long mun Novemba 2002 yet. Mi ken tingim taim Helen i kisim mipela i go long wok, oltaim em i save gat bikpela smail, toktok gut wantaim amamas na lap wantaim ol ripota inap em i go lusim o kisim bek mipela long wok. Dispela em i nambawan taim kampani i bin gat wanpela meri draiva long niusrum na long ol narapela eria tu. Tude, Helen i wok olsem Edministretiv Opisa/ Skolasip Asisten wantaim Australia Pasifik Teknikel Kolis long Idubada, Pot Mosbi.

Harim nau stori bilong Helen.

"Mi wok long stap nating na painim wok taim bos bilong Word Pablisng Kampani, em Anna Solomon, i ringim mi na tokim mi long go lukim em long kampani opis bilong ol long dispela taim i stap long Hohola.



NIUSRUM DRAIVA: Helen Singiat em smatpela Wantok niusrum draiva I wok nau wantaim Australia Pasifik Teknikel Kolis long Idubada, Pot Mosbi.

Dispela em long Septemba 2002. Dispela em bihain long wanpela gutpela poro, Mama Emelia Wani, i ring long Anna na sekim sapos kampani i gat sampela wok i stap.

"Taim mi go lukim em na mipela i toktok, em i tokim mi olsem, gutpela, bai yumi lukim sampela senis nau. Bai mi kisim yu long wok wantaim mipela na bai yu kamap olsem de taim olsem draiva bilong nius-

rum. Wok bilong yu em bai yu karim ol nius ripota i go long ol wok bilong ol na tu, kisim ol bek taim ol i pinis long wok ol i mekim.

"Mi ting dispela em i gutpela na bai mi amamas long mekim dispela kain wok. Mi wanbel long mekim san taim raun i stat long 8 kilok moning inap long 5 kilok apinun. Bikos long sait bilong sekyuriti, mi no inap long wok nait.

"Mi bin laikim stret dispela wok na mi amamas long kisim ol nius ripota i go na i kam bek long wok ol i go long en long olgeta hap kona bilong Mosbi siti. Mi bin amamas long salens mi bin gat olsem wanpela meri draiva we mi draivim ol man ripota i go na i kam long ol wok bilong ol. Ol tu i wok long amamas olsem long yangpela meri draiva bilong ol na ol i wok long kusai long ol narapela man ripota long ol narapela nius ogenaisesen. Mi no bin gat wanpela hevi wantaim ol man ripota na ol i bin givim mi gutpela luksave stret. Mi noken lusim tingting long planti ol meri ripota kampani i bin gat long dispela taim we mi bin amamas long kisim ol i go na i kam long ol wok bilong ol long Mosbi siti.

"Wanpela samting mi bin lainim long taim bilong mi long Wantok em long noken ovalodim ka bikos ol polis i bin bukum long dispela long Konedobu long wanem, 4-pela ripota i bin sindaun long baksait bilong liklik Sedan ka. Tasol mi amamas olsem bosmeri Anna i bin kam na stretim

dispela hariap wantaim ol polis.

"Mi inap wok i go moa olsem niusrum draiva bilong Wod Pablisng kampani, em Mama kampani bilong Wantok Niuspepa, tasol kar bilong mi yet i bin bagarap na i kisim longpela taim long stretim. Na mi no wanpela meri i save kisim PMV bas long i go na i kam long wok na olsem, mi bin pinis long wok we mi bin amamas long mekim insait long sotpela taim. Toktok bosmeri Anna i mekim i sutim stret sindaun mi bin stap long en wantaim kar bilong mi long dispela taim. Em long "Em kar i bagarap, em tu ya bagarap."

"Wanpela toktok mi laik mekim em, mi bin luksave na ol narapela woklain i bin toktok long en em, long gat meri draiva long niusrum i gutpela bikos meri i mekim wok stret. Na em i no wokim sampela giaman raun olsem sampela taim we sampela ol man draiva i wokim long go lusim ol ripota long wok bilong ol na ol i go lus longpela taim. Mi ting olsem meri i wok long hap we planti man i wok long en i gutpela bikos em i kamapim sampela senis long wanem meri bai mekim gut wok bilong em na mekim samting stret. Olsem na em i taim nau long ol meri draiva i strong olsem ol man na i gat gutpela pasin long ol i ken tingting long wok long ol dispela kain hap. Na mi tokim yupela, ol man bai amamas long yupela na givim yupela luksave," Helen i tok.

Buy 4WDs - trucks - buses - sedans from Japan

Tel: +81-52-219-9024 / Fax: +81-52-219-9025

1000 used vehicles from Japan:

www.JapaneseVehicles.com

GO

Some example:

PRICES IN PNG KINA, SHIPPING COST AND TAXES NOT INCLUDED.



SN 114131

PGK 3,427-

TOYOTA CAMRY '97
1.8ltr petrol, AT, silver,
80,000km



SN 114860

PGK 2,610-

NISSAN CEFIRO WAGON '99
2.0ltr petrol, AT, whitepearl,
91,000km



SN 115875

PGK 5,536-

TOYOTA CAMRY GRACIA '99
2.5ltr petrol, AT,
whitepearl/beige, 74,000km



SN 103886

PGK 3,164-

TOYOTA MARK II '96
2.5ltr petrol, automatic, white,
92,000km



SN 114630

US\$ 3,398-

NISSAN CEFIRO '99
2.0ltr petrol, AT, silver,
61,000km



SN 117393

PGK 8,436-

NISSAN MISTRAL '95
2.7ltr diesel, AT, 4WD,
black/beige, 87,000km



SN 116246

PGK 13,971-

MITSUBISHI PAJERO '97
2.8ltr diesel, AT, 4WD, green,
103,000km



SN 117441

PGK 10,281-

TOYOTA HIACE '92
2.4ltr diesel, AT,
whitepearl/brown, 86,000km



SN 104077

PGK 38,222-

MITSUBISHI ROSA '97
3.6ltr diesel, MT, white/blue,
26 seats, 93,000km



SN 117120

PGK 22,480-

ISUZU ELF '01
4.3ltr diesel, MT, white,
123,000km, High deck, 3 Ton

Wei Bilong Baim Kar Ikam Long Japan

1. Makim kar bilong yu.
Sekim web-sait bilong
mipela o askim wanpela
sels edvaisa bilong
mipela



2. Askim tasol long wanpela fri kwotesin.
Ringim mipela long
telefon, fax o e-meil.



3. Pinisim peimen.
Peim long US Dola igo
long benk akaunt
bilong mipela.



4. Bai mipela salim kar bilong yu long sip.
Gutpela rot long salim
long sip na save kam
hariap tru.



5. Yu kisim kar bilong yu.
Peim takis, rejistarim
kar ya na yu redi long
draivim.



Contact us and leave your telephone number, we will call you back. From 8:00 to 23:00, PNG time, ask for Roger / Juan.

TEL +81-52-219-9024 / FAX +81-52-219-9025

WEB www.JapaneseVehicles.com / EMAIL sales@JapaneseVehicles.com

SPARE PARTS SERVICE

Genuine Spare Parts from Japan
EMAIL parts@JapaneseVehicles.com / TEL +81-52-219-9358



TOK PISIN NEWS

from Radio Australia

radioaustralia.net.au

Harim TOK PISIN long

Radio Australia

101.9FM

Port Moresby

Tok Pisin Service

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

Ol Easter Ailan lida laik lusim Chile

OL lida bilong Ista Ailans (Easter Islands) i bin tok ol i laik bruk lusim Chile na senisim dispela wok pren bilong ol i go wantaim ol Polenesia kantri, olsem wan-pela protes long rait bilong graun na imigresen.

Sampela ol biknem asples famili bilong Rapai Nui, i bin tokim Pasifik Ailans Forum olsem ol i laik rausim dispela bung bilong ol wantaim Chile na mekim ol i kamap olsem hap bilong Osenia na maski long lukim ol olsem ol i Amerika.

Ol i bin kamapim dispela tingting insait long wanpela pas ol i salim i go long Forum na tu long Presiden bilong Chile Sebastian Pinera.

Ol as ples pipel long Ista Ailans i bin namel long hap bilong dispela 5 tausen pipel bilong Ailans, na ol i tok namba bilong ol turis na ausait pipel i laik kam stap long ailan o ol setla i bin bikipela tru.

Ol i bin krosim gavman long kisim ol hap graun bilong tum-buna bilong ol na wok ol gavman opis long en.

Ista Ailans em i stap insait long bikipela solwara bilong Pasifik, na i stap samting olsem 2 tausen mail wes bilong Chile.

Long yia 1888, Santiago i bin mekim em i hap bilong en, na mekim em i kamap provins bilong Valparaiso, tasol ol i lukim em olsem spesel teritori.

Kuk Ailans bai go long ileksen klostu

KUK Ailans (Cook Islands) i bin tokaut nau olsem em bai go long ileksen long 17 de bilong mun Novemba.

Praim Minista Jim Marurai i bin mekim dispela toktok long Palamen.

Em i tok palamen bai pinis long wok bilong em long 24 de bilong mun Septemba, tupela de tasol pastaim long taim bilong dispela gavman i pinis.

Stat long mun Desemba, Praim Minista Marurai i bin



TOKTOK TUMAS: Wanpela poto i soim ol lain i werim ol traipela helmet long het i luk olsem Praim Minista Julia Gillard na Oposisen Lida Tony Abbott long Australia. Baksait em grup Oxfam Australia i plaim wanpela balun i tok "Maski toktok tumas - katim polusen nau!" Mausmeri bilong Oxfam Australia Klaimet Senis, Kely Dent, i tok, "ol lain turangu long wol i lukluk long Australia long pinisim toktok nating bilong em na kamap wantaim samting stret. Australia i ken kamap wanpela rijinel lida na helpim long givim mani long developim klin eneji long ol pua kantri." (Poto i kam long AAP Images)

bungim planti toktok long i mas makim taim bilong elek-sen, taim i bin gat ol kros i kamap namel long sampela memba bilong Demokratik pati em nau ol i stap long gavman.

Ol memba em ol i no klostu

long Mista Maruai - em bipo ol i bin memba bilong kabinet bilong em, i bin askim Gavana Jeneral Sir Frederick Goodwin long pasim palamen na askim long ileksen i mas kamap kwik.

Ban Ki Moon i tok Pakistan tait wara i bin nogut tru

SEKRETERI Jeneral bilong Yunaitet Nesens (United Nations), Ban Ki-Moon i bin tok dispela tait wara bilong Pakistan i bin wanpela bikipela bagarap tru em i bin lukim.

Nius-meri long Saut Esia, Sally Sara i bin ripot, Sekreteri Jeneral i bin plai long balus antap long ol eria em ol i bin kisim bagarap long Punjap provins bilong Pakistan.

Em i toktok long ol samting em i lukim olsem i brukim tru lewa bilong em na i bin tok em i nonap lus tingting long ol samting em i bin lukim.

Mista Ban i bin tok ol arapela kantri i mas hariap long halivim bilong ol i go long samting olsem 20 milian pipel em dispela bagarap i bin kamap long ol.

Em i tok Yunaitet Nesens bai stap wantaim ol dispela pipel em ol i bin kisim bagarap long dispela bikipela taitwara long dispela hat-pela taim bilong ol.

Sekreteri Jeneral bai ripot bek i go long Yunaitet Nesens Jeneral Asembli sampela taim long dispela wik.

Australia Oposisen bai baim efos balus

OPOSISEN Kolisen bilong Australia i bin promis long baim tripela gutpela efos balus bilong ol wok bilong was long bikipela hap solwara bilong Australia, olsem hap difens polisi ol i bin lonsim dis-

pela wik.

Sapos em i winim ileksen, em bai spendim tu klostu 80 milian dola long givim ol memba bilong difens fos na famili bilong ol wantaim fri helt na dental sevis.

Kolisen tu bai putim 75 milian dola i go bilong pulim moa yang-pela pipel long kisim trening na joinim difens fos inap long wan-pela yia.

Labour Pati i lonsim ileksen kempein bilong em

PRAIM Minista bilong Australia, Julia Gillard, i bin tokaut olsem Leba (Labour) pati gavman bai spendim klostu 4 handret milian dola long Medikea ribeit bilong piepl em ol i laik kisim sevis long intanet.

Dispela polisi i bin kam aut long lonsim bilong Leba pati kempein long Brisben dispela wik. Long dispela lonsim, Mis Gillard i bin toktok long wok, edukesen, welfe na brodben taim em i krosim Oposisen Lida, Tony Abbot. Em i tok dispela plen bilong Labour long kamapim brodben netwok bai halivim gut ol sik pipel em ol i stap longwe long siti olsem ol i ken kisim gutpela toksave long kain sik bilong ol, sapos ol i stap wanem hap long kantri.

Tony Abbot i tok bai nogat prais bilong Kabon

LIDA bilong Australia Oposisen, Tony Abbot, i bin tok sapos em i winim ileksen, bai i nogat prais bilong kabon.

Em i toktok gen olsem dispela ol toktok bilong Seneta Brown, i bin soim tru olsem Greens Pati i wok long strongim Labour pati long bringim kam insait takis long kabon, sapos Labour i win.

Australia Greens Pati i tok i gat nid bilong Kabon takis

LIDA bilong Grins (Greens) Pati long Australia, Bob Brown, i tok namba wan samting em bai toktok long en wantaim wanem pati i winim ileksen em long kabon takis.

I luk olsem Grins bai gat bikipela namba bilong ol memba long 'upper house' o senet bihain long ileksen long Sarere.

Iluk olsem Greens bai gat bikipela namba blong ol memba long "upper Haus" oa senate bihain long elek-sen long Sarere.

Seneta Brown i bin tok bihain tasol long nupela gavman i kamap, em bai strongim Julia Gillard o Tony Abbot long bringim i kam insait prais bilong Kabon.



NATIONAL CAPITAL DISTRICT COMMISSION

PABLIK NOTIS

TOK SORI I GO LONG FAMILI BILONG SIR BRIAN BELL

Gavana bilong NCD, Hon. Powes Parkop, Bod, Menesmen na wokman meri bilong Komisin i tok bikipela sori tru i go long femili bilong leit Sir Brian Bell CSM, KBE, C.St.J long pasin nogut ol sampela lain i mekim long digim matmat bilong leit Sir Brian Bell.

Olsem lain i bosim na lukautim dispela Matmat, mipela i laik tok sori na tokim ol lain femili bilong Sir Brian Bell olsem mipela bai lukautim na putim was olsem kain samting ya i no ken kamap gen.

Sir Brian em bikipela man tru, tasol em save daunim em yet long laip bilong em. Em i mekim planti gutpela samting insait long siti bilong yumi, nesin na tu helpim pipel bilong yumi. Em i ken makim narapela ples long ol i planim bodi bilong em olsem wanpela hap long Australia, we ples em i kam long en. Tasol, long gutpela pasin bilong em, em yet i makim long kamap wankain olsem ol liklik manmeri bilong Papua Niugini na laikim olsem ol mas planim em arere long meri bilong em Jean Ann long pablik matmat long g Mail.

Dispela em narakain pasin tru na bikipela samting long dispela trupela lida man. Pasin ol stilman i makim long digim aut matmat bilong em i soim wok bilong ol man i nogat gutpela tingting na i bagarapim tru wanem gutpela wok dispela bikman i kamapim na mipela tok strong tru egensim dispela pasin nogut. Long dispela mipela i tok sori long femili bilong leit Sir Brian.

Plis yumi olgeta larim dispela gutpela bikman husat i save daunim em yet i ken malolo wantaim bel-isi. Em i mekim wok bilong en pinis long graun. Em i sevim Siti bilong yumi, Kantri bilong Yumi na Pipel bilong yumi na yumi olgeta mas soim rispekt long dispela indai bilong em.

Tok-orait i kam long:

POWES PARKOP, LLB, LLM, MP
Gavana bilong Nesinol Kapitol Distrik

PacificBEAT

Listen to Radio Australia
101.9FM Port Moresby

4, 5, 6am & 4pm, 5pm
including sport

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



NUPELA plen mas gat luksave long strongim helt sistem i stap pinis.

Helti kantri em i strongpela kantri

SAPOS yumi gat wanpela nupela intanesenel stendat haus sik long Mosbi, bai em i stretim sindaun bilong olgeta liklik manmeri long wan wan liklik ples long kantri o nogat?

Dispela askim i kamap bihain long lonsim bilong nupela Nesenel Helt Plen bilong 2011 i go inap 2020.

Het tok bilong plen em 'Back to Basics'. Dispela hap tok i min olsem plen bai sanap long ol helt woka, haus sik, nes na dokta i mekim samting stret na givim sevis long ol pipel bilong kantri bilong yumi.

Tasol toksave bilong Helt Minista Sasa Zibe, olsem i gat plen i stap tu long wanpela praivet intanesenel kampani bai kam na sanapim wanpela nupela bikpela intanesenel haus sik i gat intanesenel stendat long en, i brukim gen tingting na luksave long dispela het tok 'Back to Basics'.

I no nupela luksave, we bilip bilong ol manmeri bilong yumi long helt sistem i no moa strong olsem bipo.

Mipela i tingting planti liklik long yumi bai sanapim gen wanpela nupela 'intanesenel' haus sik long Mosbi. Watpo mipela i ting olsem? Bikos namba tu bikpela haus sik bilong yumi long Lae, Angau, em i namba wan bikpela riferal haus sik, o haus sik we i save kisim ol manmeri i gat bikpela sik tumas long ol i glasim na stretim long ol haus sik long Momase na Hailans rijen.

Nau yet Angau i no sindaun gut.

Bikpela hap bilong en i nidim mentenens, na halivim.

Watpo na yumi no inap lukluk long Angau pastaim na stretim sindaun bilong en.

I orait, olsem dispela praivet kampani i gat bikpela laik long kam na sanapim dispela nupela haus sik, tasol yumi mas tingting tu long pe ol manmeri bilong yumi mas peim long kisim sevis long dispela 'intanesenel stendat' haus sik.

I tru, nau em i hariap tumas long wari tumas long ol kain samting olsem, tasol mipela i mas toktok nau, bikos i nogat inap luksave i stap wantaim ol haus sik, etpos na bus klinik bilong yumi.

Planti ol dokta bilong yumi husat i save wok long ol provinsel haus sik, i save go wok tu long ol praivet haus sik gen.

Kalsa bilong helt wok manmeri, we bipo em i bin strong tumas, nau i no moa wankain. I gat planti ol gutpela PNG manmeri i gat laik long halivim arapela, na ol i bihainim skul long kisim ol kain wok olsem sister o nes na dokta. Tasol taim ol haus sik bilong yumi i nogat inap masin o risos we ol helt wok i ken yusim long givim sevis, em i save kilim tru tingting bilong ol helt wokmanmeri bilong yumi.

Yumi go bek gen long bilip ol pipel bilong yumi i gat long helt sistem bilong yumi tude, na bai yumi lukim olsem bilip i no strong liklik.

Long PNG, yumi stap namba tu long dai bilong mama karim insait long Pasifik. Long olgeta 100,000 mama i karim gut pikinini, 733 i save dai.

I gat planti tok luksave na tok lukaut i kam long ol dona ejensi, o ol intanesenel grup i lukim ol hevi yumi gat long helt sistem bilong yumi, tasol ating ai bilong ol bikmanmeri bilong yumi i pas yet.

Nesenel Helt Dipatmen i mas strongim namba na save bilong ol meri bilong was long ol mama karim, o ol helt woka.

Long PNG, mak bilong gutpela helt long ol rurel eria i no kamap gut na sindaun stret yet insait long 30 krismas i go pinis. Saplai bilong marasin i no gutpela, na long planti ol bus haus sik na helt klinik, wankain hevi i stap: nogat gutpela wara i stap, nogat inap wokmanmeri o savemak bilong ol wokmanmeri i no inap, ol etpos i pas, nogat rot bilong daunim ol sik i gat marasin bilong en.

Sapos gavman bilong yumi i laikim bai PNG i ken stap long wankain mak bilong kirapim wok developmen, olsem ol arapela bikpela kantri long wol, em i mas lukluk long sindaun bilong helt sevis em i save givim long ol pipel bilong yumi.

Sapos yumi no inap long strongim gut helt sindaun bilong yumi, bai yumi painim strong we long karim kantri i go het long bihain taim?



KOMENTRI

Watpo yumi no inap luksave long strong bilong tok inglis

MIPELA wanpela tok pisin niuspepa, olsem na ating bai yu tingting planti liklik long fran pes stori bilong mipela dispela wik, na watpo mipela i wok autim tingting long ol pikinini bilong yumi mas save gut long tok inglis.

Yes, i tru olsem tok pisin em i tokples bilong yumi olgeta long kantri, tasol i gat planti arapela samting we yumi PNG i mas klia long en, we Tok Inglis em i tokples long kisim save long en.

Planti ol bikpela wok na skul bilong yumi long yuni-vesiti, em i no stap long tok pisin yet.

Planti ol wok na vokesenel skul bilong yumi tude, i no stap yet long tok pisin.

Olsem na strong bilong ol sumatin bilong yumi long save long tok inglis, em i bikpela samting yet.

I gat planti arapela kantri long wol we skul na olgeta wok skul, em ol i tanim i go pinis long tokples bilong ol.

Tasol wankain olsem yumi, ol tu i luksave olsem i gat nid i stap long ol sumatin bilong ol i mas save gut long tok inglis.

Em bikos, wankain olsem yumi, kantri bilong ol i no stap ol yet.

Long wokbung wantaim ol arapela kantri long wol, i mas i gat tok ples we olgeta yet i save long en.

Olsem na wankain olsem tok pisin em i wanpela tokples we yumi wan wan bilong wan wan ples long PNG i ken luksave na yusim bilong wokbung, tok inglis em i wanpela tok ples we olgeta kantri long wol i luksave long en.

Wari bilong ol tisa bilong yumi long Morobe, olsem dispela sistem bilong givim skul long ol yangpela bilong yumi i no gutpela tumas long sait bilong strongim save bilong ol long tok inglis, em i wari we yumi noken abrusim na haitim.

Dispela wari bilong ol em i gat as sapos yumi laik redim gut ol yangpela bilong yumi long go aut na mekim wok bisnis na skul wantaim ol arapela kantri long wol.

Ol bikpela risos projek we yumi wok skin kirap long kisim long kantri bilong yumi i lukim gavman i go het long strongim ol wok na skul vokesenel long gat inap wokmanmeri long kantri long wok long ol dispela ol bikpela risos projek.

Tasol luksave tu i mas go long skulim gut ol sumatin bilong yumi long tok inglis.

Sapos skul sistem yumi gat nau i no nap long strongim save bilong ol long tok inglis, orait, gavman, na edukesen dipatmen i mas lukluk long en.

Ol i tok dispela Autkams Bes Edukesen (OBE) sistem em i gutpela bilong ol develop kantri long wanem ol rurel erias bilong ol i gat ol samting olsem intanet na kompyuta samting.

Yumi long PNG i no stap long mak wankain olsem ol yet, olsem na edukesen dipatmen i noken pasim ai na ia bilong ol long dispela wari bilong ol tisa long Morobe.

Ol i gat as long autim tingting bilong ol. Gavman, mekim samting stret.



Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500 Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Ples:	Air:
PNG	K220.00
AUSTRALIA	US\$110.00
ASIA PACIFIC na JAPAN	US\$150.00
AMERICA na EUROPE	US\$210.00

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

15-pela Draiva holim ki bilong bihain taim

TAIM ol biknem kampani olsem Air Niugini i kam insait long helpim NRL Rot Sefti – Em i no wanpela Pilai PMV Draiva Kompetisen long las wik olsem wanpela spona i soim bikpela gutpela sain tru.

Dispela em bikos ol dispela PMV draiva husat bai flai long balus i go long Sydney long NRL Gren Fainol insait long moa long wanpela mun tai mi no go long rot sefti kempein tasol. Ol i go olsem embeseda o lain i makim PNG na wet tasol long lukim mipela long senisim pasin. Olsem nae m i gutpela long balus kampani we i save wok bung wantaim ol narapela kantri i ken kisim ol i go long ofisal balus bilong PNG yet.

Gutpela sapot bilong Air Niugini i go long MVIL long kamapim pablik aweanes kempein em gutpela tru long planti level. Em i no sapotim tasol gras ruts level na long mekim olsem dispela raun bilong ol i go ovasis em ekprians tru long laip bilong ol – em ol dispela PMV draiva husat i harim na bihainim tingting bilong mipela.

Ol i bihainim dispela bikpela toktok – olsem noken dring na draiv, noken spit tumas o noken pulapim PMV tumas. Olsem na ol dispela 15-pela draiva i kamap bikpela mak tru long wanem samting i ken kamap long PNG na i gutpela long planti level. Larim mi tok klia.

Insait long wanpela niuspepa long Australia sampela wiki go pinis, biknem ragbi lig kosa na komenteta Phil Gould i tok olsem PNG i kam baksait yet sampela yia long redim wanpela tim long pilai insait long NRL. Em it ok olsem raskol pasin long stil long ol arapelaem wanpela samting, tasol em i ken isi tru long tok olsem bikhet pasin ol draiva long rot bilong mipela i save mekim tu em wanpela bikpela hevi. Em i tok tu long ol bagarap long rot na bris long kantri, na pat bilong dispela hevi long rot em ol lain draiva husat save

Senis kamap long PNG Rot Sefti



Wantaim
Dr John Mua

Dr John Mua em Menesing Dairekta bilong Motor Vehicle Insurance Limited, husat i kamapim "Rot Sefti: Emi no wanpela Pilai" pablik aweanes kempein.

yusim dispela rot.

Antap long dispela ol bikpela risos developmen i kamap long kantri we i bringim moa lain long lukim long mipela. Dispela i no kam tasol long ol lain klostu long mipela tasol olgeta lain insait long wol. Dispela i min olsem ol i wok long glasim mipela long wanem ol samting mipela i mekim long level long sosaiti bilong yumi.


Dispela 25-pela PMV Draiva i mekim yumi olsem kantri we i wok long bungim planti senis. Dispela em wei ol i mas lukim na lo i mass tap long sapotim dispela luksave long strongpela ol rot sefti lo. Taim dispela i kamap bai ol pasin bilong ol draiva bai stap olsem lo long bihainim.

Kempein bilong mipela i pas long spot ya em ragbi lig bikos long wanem hap tru yu stap long en insait long dispela naispela kantri bilong yumi, bai yu ken lukim wanpela man o meri i werim kala sios bilong Cowboys, Boncos or Eels. Yu ting olsem wanem stret bikos ol dispela jesi o siot i karim ofisal mak o logo bilong NRL kompetisen na ol PNG lain i werim. Dispela em wanpela gutpela driman ol draiva bilong yumi ken bihain gut tru.



ABURUSIM BIRUA: Lukluk gut long manmeri wokabaut long rot

SEFTI BILONG OL MANMERI I YUSIM ROT Emi no wanpela PILAI



Birua long rot i save kamap olgeta de bikos manmeri husat i yusim rot ino save lukluk gut long kar i kam. Yu mas oltaim wokabaut long sait long rot na wokabaut long sait we kar i ron i kam long yu. Em taim nau long tingting strong olsem ROT SEFTI em ino wanpela PILAI

NOKEN WOKABAUT LONG ROT OLSEM ❌



LUKIM KAR I KAM STRET LONG YU ✅



ROT SEFTI em ino wanpela PILAI

A road safety initiative by



Tenkyu Wantok



Michael Novingu i raitim

MI rait long amamasim namba 40 Anivesari bilong Wantok Niuspepa i stap long Papua Niugini long printim ol nius, na toksave long ol samting i kamap long dispela kantri, na tu long arapela hap bilong dispela graun.

Wantok Niuspepa em i wanpela tokpisin niuspepa long Papua Niugini i save printim ol stori bilong politiks, spot, raskol pasin, hevi bilong graun long maining, sios, NGO, skulna ol arapela nius ol manmeri long ples i save laikim long ridim, long wanem ol i raitim long tok pisin, em i isi long rit na save long wanem ol samting i kam long Papua Niugini na arapela hap bilong wol.

Mi bin joinim Wantok Niuspepa long yia 2000 long Madang olsem stringa o hap taim nius ripota i kam inap nau.

Mi gat tenpela krismas bilong mi long wok wantaim Wantok Niuspepa long raitim ol stori long ol manmeri bai lukim.

YUSIM SAVE MI GAT LONG WOK NIUSMAN

Taim mi stat wok long 2000, mi no bin go skul long kamap nius ripota. Nogat. Mi yusim save bilong mi yet long raitim nius i go long Wantok Niuspepa i printim long ol manmeri bai ridim na save long wanem ol samting i kamap long kantri bilong yumi.

Mi wok olsem hap taim nius ripot, mi no wok long kisim gutpela pe, na ol arapela samting. Nogat. Mi gat laik long wok long wanem mi laik mekim dispela kain wok long raitim nius long ol pasin nogut na gutpela pasin i kamap long kantri bai ol manmeri i ken lukim na save long ol dispela samting.

I tru Wantok Niuspepa i peim mi liklik mani long wok bilong mi, mi no save komplem, mi kisim tasol. Bikpela samting em m i laik long wokim kain wok olsem, long raitim niuspepa olsem wanpela gras rut ripota long ol komyuniti long Madang.

OL BIKPELA STORI MI RAITIM

Taim mi stat wok, wanpela bikpela stori tru mi bihainim na raitim em wok bilong kago kalt em Blek Jisas long Madang long 2003, we ol nius bilong mi save kisim hetlain long Madang, PNG, na arapela kantri. Long dispela stori bilong Blek Jisas tasol, mi kisim planti telepon kol i kam long kantri olsem Australia, Inghen, Jemani, Israel, we ol i laik save i tru olsem Blek

Jisas i stap long Madang, bikos ol i lukim long Intanet. Ol manmeri long dispela kantri i no save long tok pisin, tasol ol i lukim long hetlain bilong stori, na askim ol wantok bilong ol i stap long PNG bipo i tokim ol olsem i gat wok bilong Blek Jisas i stap long Madang long PNG.

Long stori bilong Blek Jisas tasol, mi kisim bikpela luksave long ol polis, gavman ol arapela niusmanmeri long Madang, na Papua Niugini.

Mi bin raitim nius bilong planti ol bikpela samting i kamap long Madang olsem eviksen ekasesais long rausim ol wairamanmeri long 2003, Manam maunten paia i pairap long 2004, PNG Australia Minista kibung long Madang long 2008, Ramu Nikel brukim graun seremoni long Basamuk long 2007, nesenel ileksen long 2007, na solwara kirap na bagarapim ol manmeri long Kaian, Botbot, na Marangis long 2008.

Na i no dispela ol bikpela stori tasol mi raitim. Nogat. Ol liklik stori mi raitim long ol manmeri long Madang na PNG i save long wanem ol samting i kamap long Madang.

Long ol dispela gutpela wok bilong mi long ripotim ol samting i kamap long Madang, mi kisim bikpela luksave long ol komyuniti long Madang i save askim mi long go long ol bikpela bung long kisim na raitim nius bilong ol.

WOK WANTAIM WANTOK STRONGIM NEM BILONG MI

Mi ken tokaut olsem Wantok Niuspepa tasol i mekim mi kamap olsem wanpela lidaman long ol komyuniti i luksave long mi na wok mi mekim. I no ol komyuniti tasol. Nogat. Ol sios, skul, yut grup, ol mama grup na ol ples laini stap long bus ples olsem Simbai, Aiom, Raikos bus, Karkar ailan, Giri long Bogia distrik, long ailan, busples long Usino-Bundi.

Ol manmeri i save long painim Michael Novingu long raitim nius bilong ol long tok pisin niuspepa.

Planti bilong ol dispela manmeri long busples i kam long taun ol i laikim Wantok Niuspepa bikos ol i raitim long tok pisin, na i isi long ridim na kisim save long ol samting i kamap long Madang na arapela hap kona bilong kantri.

WANTOK I GAT RIDA

Long wanpela wok painimaut mi yet wantaim ol tisa bilong komyunikesen ats long Divain Wod Yunivesiti long Madang i karimaut. Mipela i painim olsem 80 pesen long ol rida bilong Wantok em ol pleslain, 10% em ol sios, NGO na lain i stap long ol setelmen long

taun, 10 pesen em ol lain i kam long arapela kantri na i laik lainim tok pisin.

Mi save painim hat long rot bilong salim nius i go long Mosbi long printim, tasol mi sanap strong yet, long painim rot long salim nius i go long Wantok Niuspepa het opis bai ol i printim long niuspepa.

Mi yet mi bilip long Demokrasi, maski ol manmeri i tok baksait long mi. Mi bilip long mi yet, na mi sanap strong wokim wok bilong mi wantaim trupela na stretpela pasin long raitim nius, i mas stret long wanem samting i kamap, na wanem kain toktok ol i tok long en.

Mi no save mekim pasin bilong fefretisim, o wansait, pret, na askim long mani pastaim long mi raitim nius. Nogat. Mi wokim wok bilong mi wantaim trupela na stretpela pasin.

Mi save wokbung wantaim Divain Wod Yunivesiti long Madang, em Komyunikesen Ats Dipatmen o skul bilong skulim ol sumatin long kamap niusmanmeri.

Bosman bilong komyunikesen ats dipatmen long DWU, Bruder, Michael McManus, wantaim tupela tisa, Patrick Matbob, na Alphonse Aime, i save helpim mi gut long yusim kompyuta, telepon na ol arapela samting bilong skul wok long salim nius bilong mi go long Wantok Niuspepa het opis.

Mi bin painim hevi long Januery 2008, long taim mi bin raitim nius bilong UVistrek mani skim long Madang, na stori bilong mi i kamap long fran pes bilong pepa. Dispela i hatim tru bel bilong bosmeri bilong UVistrek long Madang, na em i tokim mi olsem em bai kisim mi go long kot. Mi we i stap yet, na inap nau, em i no kisim mi go long kot.

WOK NIUSMAN KARIM KAIKAI

Long tenpela krismas mi bin mekim dispela wok long raitim nius insait long ol komyuniti long Madang, na Divain Wod Yunivesiti i luksave long wok mi mekim na long 2008, mi kisim awod long grasrut ripoting long taim bilong Midia Fridom De long DWU long Madang.

Mi laik tok tenkyu long Divain Wod Yunivesiti long luksave long mi, long wok mi mekim, na tu, long ol arapela manmeri long Madang na sapot ol i givim long mi.

Tok tenkyu bilong mi i go tu long NBC Redio Madang, Pos Koria, Nesenel niusmanmeri long Madang long wokbung wantaim lukim Wantok Niuspepa i kam strong long amamasim 40 krismas bilong ol.

Mi laik tok tenkyu long Wantok Niuspepa long sapot ol i givim long mi long tenpela krismas i go pinis. Mi sanap strong yet long wok wantaim yupela inap wanem taim Papa God i tok mi malolo, bai mi malolo.



40 YIA ANIVESARI KEIK: Siaman bilong Word Publishing Pater Janusz Skotniczny SVD, wantaim bod memba Rev-eren Sommy Setu na Wantok katunis, Jada Wilson i katim keik.

Poto Nick Bernard

Welkam long PNG

.....histori bilong PLA Chinese nevi sip long PNG



Ol lain soldia bilong China long PLA nevi i sanap antap long trening sip na lukluk long welkam seremoni long Mosbi.



Rea Admiral Leng Zhenqing i amamas long bungim ol lain manmeri bilong Saina long Mosbi husat i go wetim sip long Mosbi bris long Tunde taim tupela sip kam sua.



James Kila i raitim

NAISPELA ret-pela kala bilong fleg bilong Saina na tu fleg bilong Papua Niugini i flai taim ol lain Saina manmeri long Mosbi na ol lain singsing grup bilong PNG i givim welkam long tupela Pipels Liberesin Ami (PLA) Nevi sip bilong China long Tunde moning long Mosbi.

Dispela kam bilong PLA Nevi bilong China em namba wan taim tru long kam sua long wanpela bris o wof long Papua Niugini. Na dispela kam bilong ol em histori stret insait long wok rilesins na poroman namel long China na PNG.

Ol lain singsing grup bilong Oro na Manus i givim samsam stret na tu ol lain China dragon danis i soim stail bilong ol long welkam long ol dispela lain nevi bilong China.

PNG Difens Fos Sif ov Staf, Komodor Tom Urr i tok welkam makim PNG Difens Fos, Minista bilong Difens na tu gavman bilong PNG long nambawan taim tru long dispela sip i kam sua long bris bilong Mosbi.

Deputi Siti Menesa, Honk Kiap i bin stap tu long wof long Mosbi long tok welkam long ol dispela lain soldia bilong China, makim maus bilong Gavana bilong NCD, Powes Parkop.

Rea Admiral Leng Zhenqing i tok amamas long gutpela welkam ol lain bilong PNG i soim ol dispela lain kadet na ami bilong China husat i kam long welkam long tupela PLA nevi sip. Tupela bikpela sip ya em trening sip "ZHENGHE" (Hal namba 81) na Friget "MIANYANG" (Hal namba 528).

Em i tokaut olsem Papua Niugini i naispela ples tru na taim ol i kam sua long bris long Mosbi ol i amamas tru long lukim naispela kala bilong bilas na welkam i kam long ol lain pipel bilong PNG.

Tupela sip ya i mekim raun bilong tupela i kam long Papua Niugini na bihain

bai go long Vanuatu, Tonga, Nu Silan na Australia insait long trening misin bilong ol long Saut Pasifik.

Ol sinia ofisa husat bai stap antap long dispela sip em: Ria Admiral LENG ZHENQING, Deputi Sif ov Staf bilong PLA Nevi, Komanda Ria Admiral SHEN JINLONG, Suprintenden bilong Dalian Naval Akademi, Vais Komanda; Sinia Kepten SONG XIDONG, Vais-Suprintenden bilong Naval Enjiniaring Yunivesiti, Vais Komanda. Olgeta lain kadet (nupela lain soldia) na ofisa em 568. Long dispela namba em 100 em ol kadet bilong Dalian Naval Akademi, 60 kadet bilong Naval Enjiniaring Yunivesiti, 40-pela kadet bilong Naval Aviesin Enjiniaring Akademi, 8-pela kadet bilong Naval Peti Ofisa Skul, 208-pela olgeta. Insait long dispela namba em 20-pela kadet em ol meri.

Dispela lukluk raun o misin i soim ol dispela samting:

Namba wan, em misin ya i bungim wantaim raun bilong ol lain woa sip na trening long bikpela solwara. Ol yangpela soldia (kadet) bilong 4-pela naval skul long China i stap insait long dispela wokabaut raun long Saut Pasifik Rijon, na dispela bai givim ol gutpela tingting na save long wanem samting ol i lainim na tu wanem samting ol bai lainim i kam long ol lain bilong ovasis kantri ol i raun i go long en. Na moa long en tu ol yangpela soldia bilong mipela bai save gut long laip long solwara taim ol i raun long dispela misin.

Namba tu, dispela misin i bungim trening na sip bilong pait o woa long raun wantaim. Ol yangpela soldia bilong China bai kisim trening antaim long woa sip long kisim save long raun long bikpela solwara. Dispela bai redim ol gut tru long kamap olsem ol kwalifaid o trupela naval ofisa.

Namba tri, dispela misin i bungim wokbung wantaim namel long ol yangpela soldia o kadet bilong China na ol nara-pela kantri wantaim. Dispela em namba wan taim tru nevi bilong China i askim ol kadet o yangpela soldia bilong Australia na New Zealand long raun wantaim ol lain soldia bilong China antap long sip. Ol soldia bilong Australia na New Zealand bai serim ol kebin wantaim, mekim trening wantaim, bung na kaikai wantaim, pilai wantaim na lainim ol nupela samting na helpim ol yet. Mipela bilip dispela gutpela pasin poroman na pasin long save gut long wanpela nara-pela bai kamap strong insait long dispela misin.

Sif ov Staf bilong PNG Difens Fos, Tom Urr i givim tok welkam long ol lain PLA Chinese nevi long Mosbi bris taim tupela sip i kam sua long Tunde. Foto: James Kila

Potos: James Kila

Program bilong Wanwan De



Mande - Fraide

6am - 10am - Sankamap show - Host: KAS.T
6:15am - Komuniti Notis Bod
6:30am - Nius Hetlains / Bondei grittings
Trukai Rais - GES FAIA KOMPETISEN
6:45am - Niuspepa Hetlains
7:00am - Major Nius Bulletin - YUMIFM Nius Senta
7:15am - Toktok sapolim LO na JASTIS Sekta
7:30am - Trukai Rais - GES FAIA KOMPETISEN
8:00am - Major Nius Bulletin - YUMIFM Nius Senta
8:15am - Stori b'long Skelim Tingting
8:30am - Trukai Rais - GES FAIA KOMPETISEN
9:00am - Nius Bulletin - YUMIFM Nius Senta
9:15am - Luksave long Komuniti (Redio Pilai)
9:30am - Trukai Rais - GES FAIA KOMPETISEN

9:45am - YUMI PAINIM WOK Segment
10:00am - Nius - YUMIFM Nius Senta
10am - 2pm - Monin Trek na Belo Pack - Host: VAVIESSIE
10:10am - Lukatim yu yet - Helt toktok - RH Hyper Mart
10:45am - YUMI PAINIM WOK Segment
11:00am - Nius - YUMIFM Nius Senta
11:10am - Cont'd - Lukauti yu yet - Helt toktok
11:30am - Nius Hetlains b'long Belo Taim
12:00pm - Major Nius Bulletin - YUMIFM Nius Senta
12:10pm - BELO Taim - wantaim sapot b'long TELIKOM
12:15pm - Komuniti Notis Bod
12:20pm - BELO Taim - wantaim sapot b'long TELIKOM
1:00pm - Nius - YUMIFM Nius Senta
1:10pm - BELO Taim - wantaim sapot b'long TELIKOM
2:00pm - Major Nius Bulletin - YUMIFM Nius Senta
2pm - 6pm - Avinun Draiv Taim - Host: Enjo Dabix
2:00pm - 4:00pm (Tunde / Fonde) TOKAUT TOKSTRET
2:45pm - YUMI PAINIM WOK Segment
3:00pm - Nius - YUMIFM Nius Senta

3:10pm - Avinun cruz
4:00pm - NIUS - YUMIFM Senta
4:10pm - "FOAPELA KAM GUD LONG 4"
4:30pm - Nius Hetlains
4:45pm - YUMI PANIM WOK Segment
5:00pm - MAJOR NIUS BULLETIN - YUMIFM Nius Senta
5:10pm - 6:00pm - FLAME KULCHA (1 hr) listeners request
6:00pm - MAJOR NIUS BULLETIN - YUMIFM NIUS Senta
6 - 7pm - Maggi noodles request aua
6pm - 00am - NAIT BEAT - Host: ANGRA KENNEDY
6:10pm - 7:00pm Mun kamap sho
6:45pm - Komuniti Notis Bod
7:00pm - 9:00pm - COCA COLA GARAMUT
9:00pm - 00am - Nait Beat - Isi Cruz long nait
00am - 6am - BRUKIM TULAIT SHOW - Host: Papa Raegs / Sally / Nenge
00:00 - Early Monin Taim Cruz (ol lain brukim tulait shift)
- Miusik / Request / Tok pilai
- Kipim Kampani long ol nait shift.

Weekend Shift - Saturday & Sunday
6:00am - 11:00am - Wiken Sanrais
6:30am - Komuniti Notis Bod - Bondei grittings
7am - 9am - Wiken Spots
9am - 11am - Monin Raun
11am - 1pm - National Weekly Hit Parade (Host Kas.T)
2pm - 6pm - Sarere Avinun Draiv
6pm - 00am - Nait Beat (Host Angra Kennedy)

YUMIFM POROMAN TEAM:
Turner (KAS.T) Arifeae - Team Leader / Program Director
Angra KENNEDY - Senior Announcer
Sinimil (Vaviessie) Philipo - Promotions Co ordinator
Papa Raegs - Announcer Nenge Neings - Announcer
Enjo Dabix - Announcer Selestine Sally Sino - Announcer

RADIO AUSTRALIA TOK PISIN PROGRAM HARIM LONG: 101.9 FM

6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afecs
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TUNDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afecs
8PM Mama Graun
8.15PM Musik/Spots
8.30PM NIUS
8.40PM Helt Riplei
8.55PM Musik
9PM Stesen Pas

TRINDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afecs
8PM Focus
8.15PM Musik/Spots
8.30PM NIUS
8.40PM Mama Graun Riplei
8.55PM Musik
9PM Stesen Pas

FONDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afecs
8PM Youth
8.15PM Musik/Spots
8.30PM NIUS
8.40PM Focus Riplei
8.55PM Musik
9PM Stesen Pas

FRAIDE - Moring - Nait
6AM Stesen Op - Nius Hetlain - Musik na ol intaviu
6.30AM Nius na Karent Afes
7AM Stesen Pas
7PM Stesen Op
7.01PM Ol Hetlain na Program Priviu
7.15PM Musik na Chit-Chat
7.30PM Nius na Karent Afecs
8PM Wantok
8.15PM Musik
8.30PM NIUS
8.40PM Youth Riplei
8.55PM Musik
9PM Stesen Pas

SARERE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Wantok
8PM Lokal Ben
8.30PM Nius
8.40PM Musik/Chit Chat
9PM Stesen Pas

SANDE - Nait
7PM Stesen op - Ol Nius Hetlain/Program Priviu
7.05PM Musik na Chit Chat
7.30PM Nius
7.40PM Femili Blong Serah (Redio Plei)
8PM Lukluk Bek Long Wik
8.30PM Nius
8.40PM Musik/Chit Chat
9PM Stesen Pas

Raun wantaim Wantok kru...
Stop 'n' Shop Vipers promosen



Lephan: Kosa tu i gat fen bilong em. Kosa bilong Vipers, Paul Komboi sainem nem long kep bilong liklik boi long Rainbow Stop 'n' Shop las wik.

Tupela raitmeri bilong likasop long Raibow S'n'S, em strong pela sapota bilong Vipers.

Ol Poto Nicky Bernard.



93FM YUMIFM National Weekly Hit Parade:
Sponsor: Digicel - bigger, better network
Produced & Host by: Kas.T
Satistes: Talalga Sophie & Poroman Crew
Week Ending: Saturday - 21st August 2010
Table with columns: Week Before, Last Week, This Week, Charting Song, Artist



Yang pela sapota bilon Stop 'n' Shop Vipers i bilas long yunifom.

YUMI save gat pasin bilong amamas, wanem samting yumi mekim o lukim save mekim yumi amamas insait long yumi yet.

Planti manmeri na pikinini i gat wei long mekim ol amamas, maski ol wari long sampela samting, tasol taim ol lukim sampela samting i pani long ol o harim sampela pani stori samting insait bilong ol bai amamas tu na dispela wari bai pinis.

Wankain long ol pilai, sapos yumi sapotim tim bilong yumi na ol win dispela amamas insait long yumi bai stap long pela taim stret.

Long wik i go pinis Wantok Niuspepa i bungim sampela sapota bilong Mosbi Vaipas, dispela ragbi tim nem bilong em i stap longpela taim nau long PNG ragbi na em tim bilong Mosbi long bipo i kam inap nau. Mosbi Vaipas em ol Stop na Shop stoa i sponsarim ol long dispela yia, taim ol save pilai long Mosbi, olgeta wok manmeri bilong Stop na Shop save go na lukim pilai, taim tim bilong i win, dispela amamas i no save pinis long skin bilong ol.

--Nicky Bernard i raitim

EMTV Television Guide

Table with columns for time slots (e.g., 4.59AM, 5.00AM, 5.30AM, 6.00PM) and program names (e.g., STATION OPEN, JOYCE MEYER, EMTV NEWS UPDATE, NATIONAL EMTV NEWS). Includes sub-sections for FONDE, 19 OGAS 2010; FRAIDE, 20 OGAS 2010; SARERE, 21 OGAS 2010; SANDE, 22 OGAS 2010; and MANDE, 23 OGAS 2010.

Raun wantaim Kanage olgeta wik

Mangi bilong bus

Papa Kanage em wanpela stail mangi bilong Wara Sepik. wanpela taim em go raun long Bogia distrik long Madang provins. Olgeta taim Kanage save raun wantaim ol yangpela mangi tasol. Tingting na toktok bilong em tu olsem ol yangpela mangi. Em stap na poroman wantaim ol yangpela meri long ples. Wanpela taim ol meri pasim tok na holim pasim Kanage long rot na karim em go long bus. Long bikmoning, Kanage stori long ol mangi, "Wan i kam, 2 kina i go. Tu i kam, 2 kina i go, na tri i kam, 2 kina i go gen. Namba foa i kam, sori, poket bruk olgeta!"

TT
Angoram

Hatwok karim kaikai

Kanage wantaim misis bilong em wok long wanpela kampani. Tupela wok go na misis bilong Kanage i gat bel. Misis bilong Kanage wok go na tupela mun bipo em bai karim em tokim bikbos bilong ol na kisim 6-pela mun malolo bilong em. Kanage tingting go na em pilim olsem em i no stret. Kanage go lukim bos bilong em na tokim em, "Bos,



misis bilong mi kisim 6-pela mun malolo. Inap mi kisim 6-pela mun malolo tu?" Bos lukluk long Kanage na askim, "Olsem wanem, yu i gat bel tu?" Kanage bekim, "Bos, yu save luksave olsem mitupela i wok hat ya. Olsem na nau kaikai bilong hatwok laik kamap ples klia, mitupela wantaim i mas malolo."

Masta Kanage
Daru

Marasin nogut

Bikpela sik wilwilim papa Kanage ne em slip long haus stap. Em askim pikinini meri bilong em long go askim ol lain long haus sik long sampela marasin. Pikinini bilong em i gat bel na em go long haus sik kisim marasin bilong em na em lus tingting long kisim marasin bilong papa bilong em. Long apinun em kam bek long haus. Kanage slip go na em kirap lukim ol marasin stap insait long bilum bilong pikinini meri bilong em. Isi tasol Kanage

Porohia Duo
Vanimo

Ol skwat!

Salim ol gutpela Kanage
tok pilai i kam long:
Kanage Tok Pilai
P.O. Box 1982,
Boroko, NCD
Port Moresby.
Email: atolire@wantok.com.pg

kisim bilum bilong pikinini bilong em na rausim ol marasin. Em lukim na ting olsem disprin o asprin. Kanage kisim wanpela kap wara na dring wanpela marasin na slip gen. Pikinini bilong em lukim olsem bilum bilong em slip arere long papa bilong em. Em kirapim Kanage na askim em sapos em rausim bilum bilong em. Kanage tokim em, "Yes, pikinini. Mi kisim marasin bilong mi na mi dring olsem na mi slip." Pikinini bilong em singaut go long mama bilong em, "Aiyol! Mama, papa i paul na dring marasin bilong ol mama i gat bel ya!" Misis bilong Kanage harim na tok, "Larim, pikinini. Papa dring na em bai kisim ples bilong yu na yu ken malolo!"

Tisa i no mekim gutpela pasin long mi

Dia Laiplain,

Mi gat bikpela kros tru long wanpela tisa bilong mi bikos em i no save laikim mi long taim mi stat skul yet. Sapos mi stap wantaim sampela ol narapela sumatin na ol i mekim wanpela rong, em i save krosim mi nating. Em i no save painimaut gut pastaim na kros.

Em i save tokim ol narapela tisa na sumatin olsem mi wanpela trabel manki husat i save mekim samting long laik bilong em na i no save harim toktok bilong em. Mi no amamas long dispela samting. Na ol sampela poroman bilong mi i gat tingting long paitim em.

Suffering

Dia pren,

I NO gutpela long wanpela manki i pilim nogut long olgeta taim bikos taim bilong skul em i taim bilong amamas. Tasol sampela taim kain samting olsem yu toktok long en i ken kamap.

Mipela i no klia long wanem as tru na dispela tisa bilong yu i no save laikim yu. Ating bikos yu save mekim rong planti taim. Na tu yu no save harim tok bilong em o yu no save mekim gut skul wok bilong yu.

Sapos yu wantaim ol narapela sumatin i wokim wanpela trabel, dispela tisa i lukim yu olsem lida bilong dispela grup. Olsem na em i save sutim tok long yu long trabel ol lain bilong yu i mekim.

Planti tisa i save laik long kamapim gutpela pasin namel long olgeta sumatin bilong ol. Na tu ol i save traim long noken laikim sampela sumatin tasol na les long ol narapela. Tasol



sampela taim ol sumatin i no save soim gutpela pasin long ol tisa bilong ol. Sampela sumatin i save les na mekim planti nois long klasrum na tu, ol i no save harim tok bilong tisa.

Dispela i save mekim tisa i kros na i no save laikim dispela ol sumatin.

Olsem na pastaim yu go het na komplem long tisa bilong yu, yu mas luksave long dispela ol kain ol samting, orait yu mas senisim pasin bilong yu. Na noken pas wantaim ol sumatin husat i no save harim toktok bilong tisa.

Sapos yu ting olsem hevi i no stap long dispela samting, orait watpo na yu no laik toktok waintaim hetmasta long dispela hevi yu bungim long en? Tokim em long ol taim dispela tisa i no bin mekim gutpela pasin long yu. Tokim em tu long wanem samting yu pilim na askim em long helpim yu.

Sampela poroman o wanklas bilong yu i ken go na tokim dispela tisa long pasin em i save mekim long yu. Sapos ol i go na tokim em long stretpela na gutpela wei olsem yu wok long kisim na rong long samting yu no mekim, ating em bai bilipim ol. Na em bai traim long mekim gutpela pasin long yu.

Sapos yu laik toktok wantaim hetmasta o ol wanklas bilong yu, yu mas toktok isi na tokim ol long ol stretpela samting. Tasol sapos yu toktok strong o singaut, ol bai belhat na bai i no inap

harim toktok bilong yu na helpim yu.

Narapela samting tu i olsem, yu noken tingting tumas long dispela samting bikos olgeta manmeri i save kros taim ol narapela manmeri i no save mekim gutpela pasin long ol. Long olgeta hap yu go, yu bai painim olsem i no olgeta manmeri i save mekim gupela pasin tasol, nogat.. Sampela i save mekim pasin i no gutpela.

Dispela samting i ken mekim yu wari. Tasol bihain long sampela taim bai pinis sapso yu lus tingting long dispela ol samting. Sapos yu no ting lus long dispela samting na wok long tingting tumas, dispela bai bringim bikpela wari tru long yu.

Yu mas luksave olsem i no hevi i save mekim ol manmeri i wari. Kros bilong ol yet i save kamapim hevi na bikpela wari. Sapos yu no lus tingting long dispela samting na wok long tingting tumas, dispela bai bringim bikpela wari tru long yu.

Yu mas luksave olsem i no hevi i save mekim ol manmeri wari. Kros bilong ol yet i save kamapim hevi na bikpela wari. Sapos yu lus tingting long dispela samting, yu bai i no inap long pilim wanpela wari na hevi.

Laiplain

Sapos yu gat wari, rait i kam long Lifeline, P O Box 6047, Boroko, NCD. Telipon:3260011. Raitim trupela nem na etres bilong yu na bai mipela i ken salim bekim long pas bilong yu. Bai mipela i no inap putim trupela nem bilong yu long stori.

Laiplain



NEM: Emmanuel Tifa

KRISMAS: 17 (man)

ADRES: Bema High School, Private Mail Bag, Lae, Morobe province

SAVE LAIKIM: Harim musik, pilai soka, stori, go lotu na ritim buk.

NEM: Andrew Banakato

KRISMAS: 17 (Man)

ADRES: Bema High School, Private Mail Bag, Lae, Morobe province

SAVE LAIKIM: Pilai ragbi, stori, mekim pani, ritim buk, raitim pas, pilai gita, harim musik na go lotu.

NEM: John Jons

KRISMAS: 18 (man)

ADRES: Bema High School, Private Mail Bag, Lae, Morobe province

SAVE LAIKIM: Pilai musik, soka, volibol, serim ol samting, go lotu na pilai spot.

NEM: Thomas Kuni

KRISMAS: 18 (man)

ADRES: Bema High School, Private Mail Bag, Lae, Morobe province

SAVE LAIKIM: Pilai spot, pilai musik, harim musik na go lotu

NEM: Peter Moran

KRISMAS: 24 (man)

ADRES: P.O Box 541, Kimbe, West New Britain Province.

SAVE LAIKIM: Pilai soka, volibol, na basketbol, lukim TV, danis na wokim gaden, ritim buk na mekim pani

NEM: Irami Peter

KRISMAS: 19 (Man)

ADRES: Mora Mora Technical School, PO Box 23, Hoskins, West New Britain Province.

SAVE LAIKIM: Pilai spot, raitim pas, mekim pren na harim musik

NEM: Kate Peter

KRISMAS: 20 (meri)

ADRES: Mora Mora Technical School, PO Box 23, Hoskins, West New Britain Province.

SAVE LAIKIM: Harim musik, pilai gita, mekim pani na raitim pas na go lotu

NEM: Rita Ande

KRISMAS: 19 (meri)

ADRES: Integrated School, P.O Box 907, Kimbe, West New Britain Province.

SAVE LAIKIM: Kukim kaikai, pilai spot, harim musik, raitim pas, mekim pren, na go skul

NEM: Lowi Imias

KRISMAS: 22 (man)

ADRES: C/- P.O Box 96, Wau, Morobe Province

SAVE LAIKIM: Mekim pren, mekim pani, stori na raitim pas

NEM: George Luguni

KRISMAS: 22 (man)

ADRES: P.O Box 33, Mendi, Southern Highlands Province

SAVE LAIKIM: Pilai ragbi, basketbol, soka na voli-bol, stori, pilai gita na go lotu



KAMAPIM MAK: Sinia Projek Menesa Mark Hackney i toktok long ol wokman long taim ol i amamas long rekot bilong nogat birua i kamap em Pot Mosbi Teknikol Kolis i kamapim.

PNG LNG Konstraksen Trening Fasiliti kamapim gutpela mak

PAPUA Niugini Likuifaid Neteurel Ges Konstraksen Trening Fasiliti (CTF) long Mosbi i kamapim long ol i no bungim hevi long taim bilong wok long las yia.

CTF i kamapim olsem 500,000 aua we i nogat birua i kamap long wanpela wokman inap long 300 de olgeta.

I nogat dai, nogat taim we wokmanmeri i kisim bagarap o wanpela i go long kisim marasin long em.

Long dispela Esso Hailans Limited (EHL) Menesing Dairekta Peter Graham i amamas na i tok: "Dispela mak bilong wokmanmeri i no kisim bagarap long taim bilong wok i makim wanpela gutpela mak em kampani i kamap long em."

CTF i stap long Pot Mosbi Teknikol Kolis (PomTech) we i ples we PNG LNG bai kisim ol wokmanmeri long em.

Inap olsem 28 kontrekting kampani em LNG Projek i yusim na long dispela 24 i save stap long PNG.

Namba bilong ol wokmanmeri nau i stap long 311 na planti bilong dispela ol lain em ol PNG nesenel.

"Em i gutpela long lukim ol supavaisa na ol wokmanmeri i holim strong tingting bilong kampani olsem 'Nogat wanpela i mas kisim bagarap' na 'Wanpela Sait-Wanpela Tim.'"

"Mi amamas long gutpela mak em mipela i kamap long em," Mark Hackney, Sinia Projek

Menesa i tok.

Kampani i hop long pinisim wok konstraksen long Oktoba we namba wan ol treni sumtin em ol bai kisim long pinis bilong dispela yia.

CTF bai gat ples bilong kisim na trenim moa longn 750 sumatin long wanpela yia na skul ol i kisim bai stap long intanesenel standet.

PNG LNG Projek i givim olsem K150 milion i go long kamap na wok bilong Pot Mosbi Teknikol CTF na Juni CTF long Sauten Hailans Provins long foapela yia konstraksen taim.

PoM Tech CTF bai givim i go long Gavman bilong PNG bihain long konstraksen bilong PNG LNG projek.

Marengo kisim K61.14 milion mani mak em i laikim

Paul Zuvani i raitim

MARENGO, Australia kampani we i mekim fisibiliti stadi long kopa, molibdenum na gol projek long Yandera, Madang Provins i kamapim pinis mani mak em i laikim long pinisim stadi na dril wok bilong emn long projek.

Kampani i kamapim Aus\$21.4 milion (K61.14 milion) long las wik Fonde 12 Ogas.

Dispela Intanesenel kopa developmen kampani i kamap long dispela mak long taim em i tokaut em i salim 240,000,000 yunit bilong em long Aus\$0.09.

Wan wan yunit i gat wanpela odinari sea bilong kampani na i gat fri wanpela wan kuasa bilong wanpela sea.

Inap long kisim wanpela warena long kisim wanpela odinari sea bilong kampani long prais bilong Aus\$0.125 inap long 11 Ogas, 2013.

Paradigm Kapital Inc. i go pas dispela maket na i kisim sapot long Fraser Mackenzie Limited.

Planti ol biknem kampani na investa long Not Amerika i stap insait long dispela ofa na i givim sapot bilong ol.

Kampani i bin aplai long raitim odinari sea i go na mekim ofa long Toroto Stok Eksenis.

Kamapim kain mani mak long dispela taim i kamap long taim we Marengo, i wok long go klostu long pinisim Difinitiv Fisibiliti Stadi (DFS) bilong em.

Marengo i 100 per sen papa bilong Yandera Main.

Em i namba tu bikpela mak em kampani i kamapim bihainim namba wan Aus\$21.7 milion mani mak em kampani i kamapim long las yia Septemba long Kanada na Australia we dispela i lukim George Soros' bilong Quantum Partners LDC bung wan-taim Marengo na i kisim olsem 19.9 pesen.

Dispela mani em kampani bai yusim long jeneral koporet na wokong kapitel.

DFS bilong Yandera i bihainim tingting bilong em long kamapim bikpela open pit maining wok we bai stap inap long 20 yia.

Long kamap long dispela mak Marengo Menesing Dairekta Les Emery i tok: "Dispela em i bikpela mak na mi laik tok tenk yu long ol nupela na olpela investa husat i givim sapot long kamapim long dispela mani mak na mipela tok welkam long ol nupela investa long kam regista long sea bilong mipela.

"Moa yet mi laik tok tenk yu long Paradigm Kapitel na Fraser Mackenzie long hatwok bilong ol long staim dispela projek i kam inap pinis bilong em.

"Mani em mipela i kisim bai helpim mipela long surukim wok bilong mipela i go long bikpela Yandera Main.

"DFS bai pinis long pinis bilong dispela yia."

"Wantaim DFS sampela mani em mipela bai yusim long mekim dril."

BSP givim nupela laip long Wabag Polis Mobail Skuad



TENK YU: Ol opisa bilong BSP Wabag wantaim Polis Mobail Yunit i sanap amamas long nupela polis opis we BSP i helpim long stretim.

POLIS Mobail Skuad long Wabag nau i ken wok na stap long gutpela opis bihain long Benk bilong Saut Pasifik (BSP) i helpim ol long stretim.

Dispela opis i bruk daun na i nogat gutpela hap bilong ol opisa i stap na wok long em inap long BSP aninit long komyuniti Projek progrem bilong ol i kamap na helpim ol.

BSP Wabag Brens bosmeri Cecilia Raepa i tok Polis yunit i amamas tru long dispela helpim em benk i givim long ol.

"Ol i no inap long tok tenkyu long BSP long bikpela helpim em benk i givim long ol.

"Ol i painim hat long stretim inap long benk i kamap na stretim wari bilong ol," Mis Raepa i tok.

Skuad Komanda Henry Ereman long taim bilong kisim bek ki long ol wokman bilong benk i tok ol i amamas tru long gutpela wok na helpim em benk i givim long ol.

Projek i stat long 5 Julai na pinis long dispela mun.

Planti bilong ol opisa em ol i salim i go wok long Porgera, Enga provins yet na Tari long Sauten Hailans Provins.

BSP i gat progrem we wan ol brens i mas karimaut sampela komyuniti projek bilong ol.

Na long Wabag ol i makim Wabag Polis Stesin olsem projek ol i laik sapotim.

Stretim bilong stesin em bilong sapotim polis long daunim hevi i pas long lo na oda tu.

Pailot NARI Broila Haus long Komperi Veli

Fred Besari (NARI) i raitim

WANPELA pailot projek bilong Nesenel Agrikalsa Risets Institut (NARI) long skul bilong kamapim na lukautim ol kakaruk i kamap na pinis gut long Komperi Veli, Kainantu, Isten Hailans Provins long las wik.

Dispela kos i kisim inap 6-pela wik olgeta stat long Jun i kam.

Dispela kos i kamap bihainim tok orait i kamap namel long NARI na Kafetina Fama Koporetiv Sosaiti long Kainantu.

Long lukim sapos ol fama i lainim na save gut long samting ol i kisim skul long em, ol tisa i askim ol long mekim wanpela konsentret o kaikai bilong ol kakaruk.

Long dispela taim planti kakaruk fama long Papua Niugini i laik long lukautim ol broila o mit kakaruk.

Bikos ol i ken gro hariap, i gat planti mit na taim ol fama i salim ol i mekim bisnis long em.

Tasol taim ol fama i laik long bekim bisnis long dispela sekta, ol i save bungim hevi bilong kos long baim kaikai na trenspot long go i kam.

Long bungim dispela ol hevi NARI i kamapim dispela skul long lukim ol fama i no lusim wok na mani bilong lukautim kakaruk, tasol i skruim yet dispela wok.



AMAMAS: Ol kakaruk fama bilong Komperi Veli i amamas na soim kakaruk ol i kisim skul long lukautim. Foto: Fred Besari

NARI i skulim ol fama long yusim kaukau na tapioka long kamapim kaikai bilong kakaruk.

Ol kamapim kaikai long tupela rot, wanpela em long lukim ol memeim kaukau na tapioka.

Narapela em ol i katim liklik na draim long san.

Ol i soim ol fama long Komperi Veli long bungim ol finisa kaikai wantaim kaukau olsem wanpela hap bilong lou eneji konsentret na 3-pela hap bilong kaukau.

Long dispela skul ol fama i lain long kamapim kain kaikai we ol i ken kamapim long ol kakaruk we tripela wik olpela na 6-pela

wik olpela. Long wanpela de olpela i go long tripela wik olpela, stat i go inap long pinis bilong givim kaikai long ol kakaruk.

Stanley Hegins, wanpela fama husat i kisim skul long dispela taim i tok em i amamas long kisim kain skul olsem.

Em i tok dispela skul i opim ai bilong em long mekim kain kain kaikai bilong kakaruk we bipo em i no save long em.

Kamapim kaikai long kaukau na tapioka i daunim tu namba bilong kaikai ol i save baim long stua olsem 50 kilogram kaikai i kamdaun long 30

kilogram kaikai.

Long taim ol kakaruk i gat 6-pela wik ol i mas gat tu (2) kilogram o long tu na hap (2.5) kilogram.

Albert Kirimpa, Siaman bilong Kafetina Fama Koporetiv Sosaiti i tok wok painim em NARI i mekim long lukautim kakaruk na pik tu em i kamap long taim Sosaiti i traim long daunim ol hevi pas wantaim ol yangpela.

Em i tok skul we ol fama i kisim bai helpim ol gut long lukautim kakaruk bilong ol na painim rot long kisim mani long em.

PNG bung wantaim Pasifik kantrilong toktok bilong kamapim kaikai

Soldier Buruka (DAL) i raitim

PAPUA Niugini i wanpela bilong 14 Pasifik Ailan kantri husat i redi long kamapim Fud Sekyuriti na Sastenabel Lailivud Program (FSSLP).

FSSLP i kamap aninit long Fud na Agrikalsa Oganaisesen (FAO) we as tingting bilong em long kamapim kaikai bilong strongim ol turangu planti em ol meri na ol yangpela.

Dispela program i bilong stap givim tingting long ol Pasifik Ailan kantri olsem kamapim kaikai i bikpela samting na olsem ol i mas mekim long strongim laip bilong ol lain husat i no inap long sapotim ol yet.

Ol bikpela tingting long stap bilong fud sekuriti em long kaikai i mas stap, i isi long kisim, long rot bilong yusim na i gat kaikai oltaim.

Ol gavman bai lukluk long kamapim kaikai, abus, lukautim pis, kumu na diwai bilong strongim laip.

Dispela program bai lukim olsem wan wan ol haus i kisim ol sevis, kamapim toktok bilong wok didiman na gat sans bilong mekim maket.

Ol arapela samting em long ol atoriti i kamapim ol polisi na plen bilong stretim hevi bilong sot bilong kaikai.

Tupela FAO saveman husat i stap long Samoa, Aleki Sisifa na Dokta Siouisia Halavatau i bin kam long PNG long toktok long FSSLP wantaim ol opisa long Dipatmen bilong Agrikalsa na Laipstok na ol arapela opis we wok bilong ol i pas long dispela program.

Long taim bilong toktok long woksop, Deputi Seketari bilong Dipatmen bilong Agrikalsa na Laipstok Francis Faink, long makim maus bilong Seketari i tok FSSLP i opis we i kisim tu wok bilong Rijnel Program Fud Sekyuriti long karimaut 2004 i go long 2007 na inapim tingting bilong PNG long kamapim moa kaikai long strongim laip bilong ol manmeri.

Em i tok PNG i kamapim pinis ol polisi na plen pinis long lukluk bilong hevi bilong fud sekuriti tasol kamap bilong FSSLP i inapim dispela tingting.

FSSLP bai stap aninit long lukaut bilong ol ejensi bilong PNG olsem PNG Visen 2050 tu.

Wol Benk givim mani long strongim kopi na kakau industri

Soldier Buruka (DAL) i raitim

DIPATMEN bilong Agrikalsa na Laipstok (DAL) i tok amamas long helpim em Wol Benk i givim long sait bilong mani long kakau na kopi industri.

DAL Seketari Anton Benjamin long makim maus bilong Minista bilong Agrikalsa John Hickey na tok tenkyu long Wol Benk na Intanesenel Fan bilong Agrikalsa Developmen (IFAD) long helpim long givim mani long Prodaktiv Patnasip long Agrikalsa Projek (PPAP).

Long Mande 9 Ogas long las wik Minista bilong Fainens na Tresari, Peter O'Neil na Wol Benk Kantri Dairekta long PNG, Timor Leste na Pasifik Ailan, Ferid Belhaj, i sainim tupela tok orait long kisim dinau inap long mani mak bilong K121.21 milion long givim sapot long wok didiman na telikomyunikesen long ol rurel ples.

Ol bai kamapim ol infrastraktsa olsem rot, bris na ol arapela samting bilong helpim ol manmeri long go isi long ol maket.

PPAP bai helpim ol fama bilong kopi na



TENK YU: Mista Benjamin, Seketarim bilong Dipatmen bilong Agrikalsa na Laipstok.

kakau long ol provins olsem Is Nu Briten, Otonomes Rijen bilong Bogenvil, Isten Hailans, Westen Hailans, Jiwaka na Simbu provins.

Mista Benjamin i tok agrikalsa sekta i givim luksave na i tok orait long Kantri Asistens Strateji (CAS) bilong Wol Benk long bringim developmen i go long agrikalsa na ol arapela sekta long rurel ples.

Em i bilip long ol toktok i stap long dispela polisi na i tok PNG bai lukim sapot long dispela helpim.

"Smolholda produsa i gat bikpela wok long strongim kantri long sait bilong kamapim mani.

"Bihain long pinis bilong planti bikpela ol plentesen long taim bilong independens na kam kantri bilong mipela i stap long strong bilong ol liklik kakau na kopi fama.

"Ol smolholda fama i kamapim olsem 50 pesen mak bilong kakau na kopi em kantri i save salim i go aut.

"Na em i gutpela gavman i mas givim gutpela sapot long ol," Benjamin i tok.

Em i tok maski prais bilong wel pam i go antap long dispela taim tingting bilong ol manmeri long wok long kakau na kopi bai stap yet.



GIVIM: Oi ofisol na sumatin bilong DBTI skul long Mosbi kisim Trukai Fan Ran siot bilong ol long SP Brewery las wik.
POTO: SP Brewery.



PAINIM ROT: Telikom pilaia i laik rausim bal bipo long birua bilong em bilong University pasim em long Mosbi primia soka resis bilong ol meri.
POTO: Andrew Molen.



BUNGIM TIM: Oi Stop 'N' Shop Vipers pilaia i bung wantaim ol sapota bilong ol long Mosbi las wik bipo long gem bilong ol.
POTO: Nicky Bernard.



PASIM EM: Pilaia bilong Esco Telstars i tyraim long pasim birua bilong em bilong Veupunama long Mosbi netbol gem bilong ol las wik Sarere.
POTO: Andrew Molen.

NRL SPOTS DRO
RAUN 24 Ogas 20-23 2010

Gems bilong dispela wik

Cowboys V^s Bulldogs

Eels V^s Tigers

Knights V^s Broncos

Panthers V^s Rabbitohs

Raiders V^s Dragons

Roosters V^s Titans

Eagles V^s Warriors

Storm Sharks

Raun 23 - Poin Leda

TIM	W	L	D	B	Pts
1 Dragons	15	6	0	2	34
2 Titans	13	8	0	2	30
3 Tigers	13	8	0	2	30
4 Panthers	12	9	0	2	28
5 Roosters	12	9	0	2	28
6 Warriors	12	9	0	2	28
7 Eagles	11	10	0	2	26
8 Broncos	11	10	0	2	26
9 Rabbitohs	10	11	0	2	24
10 Eels	10	11	0	2	24
11 Raiders	10	11	0	2	24
12 Knights	9	12	0	2	22
13 Bulldogs	7	14	0	2	18
14 Sharks	6	15	0	2	16
15 Cowboys	5	16	0	2	14
16 Storm*	12	9	0	2	0

* Ol I rausim olgeta primiasip poin bilong Melbourne Storm bilong 2010 sisen.

Parramatta i gat sans yet

PARRAMATTA Eels i gat sans yet long go insait long fainols resis bilong NRL dispela yia bihain long ol i winim Brisbane Broncos las wik Fraide, 30-14 long Suncorp stadium.

Dispela em wanpela gem we ol i mas winim long stap insait long Top 8 na ol i strong long pasim ol Broncos long namba tu hap bilong gem.

Long taim winga bilong Eels, Luke Burt i putim wanpela stail trai long namba 72 minit long kisim ol i go pas 24-14.

Burt i kikim bal abrusim het bilong Broncos fulbek, Josh Hoffman na ron i go kisim gen na skoa.

Bihain, nupela pilaia, Anthony Mitchell, i pasim rot wantaim wanpela trai bilong em tu long fultaim stret.

Darren Lockyer i no bin pilai long dispela gem tasol Broncos i putim strongpela salens tu agensim ol Eels.

Broncos i kisim sampela gutpela sans long skoa tu tasol banis bilong Parramatta i strong.

Ol i pasim tu Brisbane fowet, Sam Thaiday long putim wanpela trai long namba tu hap bilong gem.

Eels lok, Feleti Mateo na fulbek, Jarryd Hayne i pilai strong tru long helpim tim bilong ol.

Hayne i putim namba wan trai bilong ol long namba wan hap bilong gem na i abrus long putim namba tu trai bilong em long namba tu hap bilong gem.

Em i brukim difens bilong Broncos, kikim bal abrusim Hoffman, ron i go kisim na traim long skoa tasol Broncos winga, Antonio Win-



KEPEN: Cayless i amamas long tim. Em i holim rekot nau olsem long taim kepten bilong klap.

terstein i wokhat long traim na bagarapim dispela trai.

Vidio refri painim olsem Hayne i pundaunim bal na i no skoa.

"Mipela i wokhat tru tete," Eels kepten, Nathan Cayless i tok.

Dispela tu i bin namba 217 gem bilong Cayless olsem kepten we i abrusim mak bilong bipo Penrith na Roosters biknem, Brad Fittler.

"Mipela i no pilai gut tumas i kam tasol nau nait mipela pilai strong na i gutpela long mipela i gat sans gen dispela sisen," em i tok.

Eels kosa, Daniel Anderson i amamas long ol pilaia bilong em.

"Mipela i kisim planti pen long gem tasol mipela i amamas long

dispela win," em i tok.

Em i luksave tu long Cayless olsem long taim kepten bilong klap.

"Dispela em i bikpela samting tru.

"Bihain long 112 yia, em i kamap olsem kepten bilong klap lonpela taim moa long ol arapela," Anderson i tok.

Kosa bilong Brisbane, Ivan Henjak i tok ol i no bin inap long pasim ol Eels long dispela nait.

"Ol i bin gutpela tumas long mipela, ol i hangre tru long gem bilong ol tasol mipela tu i no kamapim sampela samting mipela i bin laik mekim," em i tok.

Rogers bai pinis pilai dispela sisen

SENTA bilong Gold Coast Titans, Matt Rogers i redi long pinis long pilai ragbi lig dispela yia.

Em bai lusim pilai tasol bai wok yet long sait bilong maketing insait long klap yet.

Rogers, 34 krismas, i pilai 4-pela yia nau wantaim Titans bihain long em i kam bek long ragbi union we em i pilai 5-pela yia wantaim NSW Waratahs.

Em i pilai 194 gem bilong ol NRL long fes gred na i gat sans long kisim dispela namba i go long 200 sapos ol i go insait long fainols.

"Mi pilim olsem mi nap long pilai yet tasol mi ting em i gutpela taim nau long lusim na go aut," Rogers i tok.

"Taim em i rait nau long lusim pilai," em i tok.

Matt em pikinini bilong bipo biknem



INAP: Roger bai pinis pilai tasol I lukfowet long ol nupela salens long laip bilong em.

pilaia, Steve Rogers.

Em i bihainim lek mak bilong papa bilong em na i pilaim namba wan gem bilong em long 1995 wantaim Cronulla Sharks.

Rogers i pilaim 123 gem olgeta wantaim Sharks we i lukim ol i lusim 1997 supa lig gren fainol agensim Broncos na tu prillimineri fainol long 1996, 1999 na 2001.

Em i pilai 5-pela gem bilong Queensland long stet ov orijin na 11-pela tes bilong Australia.

Rogers i go long ragbi union long 2001 na i makim Australia Wallabies long hap long 2001 wantaim Wendell Sailor.

Rogers i pilaim 45 tes bilong ol Wallabies we i lukim em i stap insait long 2003 wol kap long Sydney.

Em i kam bek long ragbi lig long 2007 na pilai 73 gem bilong Titans pinis.

"Mi ting mi mekim inap.

"Mi lukfowet nau long wanem ol nupela samting bai kamap long laip bilong mi," em i tok.

Ol i painim bodi bilong bipo etlit

OL i painim bodi bilong bipo rana bilong Amerika, Antonio Pettigrew, insait baksait sit bilong kar bilong em las wik.

Pettigrew, 42 krismas, em wanpela bilong ol 4x400mita rana husat ol ofisol bilong Olimpiks i kisim bek gol medol bilong ol bihain long ol i painim aut olsem ol i kisim drak long winim dispela resis.

Polis long Chatham County long Amerika, i bilip Pettigrew i no dai nat-ing.

Ol i ting em i kilim em yet o em i mekim wanpela samting na i painim birua.

Polis i tok ol dua bilong kar i bin lok na ol samting i soim olsem Pettigrew i kisim marasin bilong silip.

Ol i no painim samting we i soim olsem sampela lain i kilim em.

“Nau yet mipela i no save sapos em i kisim dispela ol marasin long kilim em yet o em i yusim ol karangi na i kilim em,” mausman bilong Polis i tok.

Em i tok tupela poro bilong Pettigrew i painim bodi bilong em.



NEM NOGUT: Pettigrew i bin wanpela bilong ol man husat i kisim drak long 2000 Olimpik gems long Australia.

Ol i ting em i silip tasol em i no bekim ol.

Polis i kamap long hap long tri kilok moning na i tok em i dai pinis long hap yet.

Pettigrew i wok olsem asisten kosa

bilong etletiks long yunivesiti bilong North Carolina inap long dai bilong em.

Polis i tok ol wok painim aut bai kamap yet long traime na save long Pettigrew i dai olsem wanem.

Muruks i no lus olgeta

i kam longpes 28

Ol i go pas wantaim 21 poin, Gurias i kisim namba tu sia wantaim 20 poin, Mioks baksait tasol wantaim 19 poin, Lahanis 16 na Warriors 15.

Dispela em 5-pela tim husat i stap long top faiv tasol Vipers (13), Rangers (13), Lae Bombers (11) na Kuris (6) i no lukim ol i stap longwe tumas.

Ol i ken wokim sampela bikpela senis insait long ol pilai we stap aut yet.

Long Muruks yet, pilai bilong ol wantaim Mioks (R15), Warriors (R16) na Rangers (R17) em ol bikpela pilai we ol mas winim.

Wantaim Kuris long Raun 18, ol i gat bilip olsem ol bai kisim tupela poin nating, tasol bikpela pret bilong ol em wantaim ol arapela bikpela tim we i gat planti gutpela pilaia insait.

Long las tupela sisen, Muruks i no smelim fainols, bihain long winim taitol tripela sisen pastaim.

Dispela hangre bilong stap insait long fainols i mekim ol i kam bek strong dispela sisen.

Mioks, Lahanis, Rangers, Vipers na Bombers i gat dispela wankain driman tasol i luk olsem dispela sisen klostu bai pinis na olgeta i taitim bun long stap insait long fainols.

Narapela bikpela pilai bai kamap long Goroka we Lahanis bai traime stretim dinau bilong ol wantaim Rangers.

Las taim ol Rangers i win long tupela poin 20-18 long Lloyd Robson pilai graun long Mosbi.

Tasol nau Lahanis i redi long bekim dinau long Nesenel Spots Institiut (NSI) pilai graun long Goroka.

Beklain bilong Lahanis, Thompson Tete bai lukluk long sapot bilong fulbek Adex Wera, senta na bipo PNG Pukpuk, Chris Hogi na Kevin Inagafa.

Kam bek bilong Warriors i mekim planti nois pinis na ol i ron gut long dispela resis.

Ol i wok long winim ol pilai bilong ol long Kundiawa gut tru na dispela i kisim gutpela sapot tu long ol bisnis na gavman long Simbu.

Politiks bilong Hagen i bagarapim Kuris long dispela yia na ol i no pilai gut tasol dispela i no wanpela samting.

Kuris i gat ol gutpela yangpela ol pilaia husat i bin kam antap long pilai olsem na ol i mas lukluk long pilai bilong ol long yia i kam.

Gurias i winim fainols long las yia na laik skruim strong bilong ol gen dispela yia.

Wankain olsem Muruks, ol i mas strongim kona bilong ol long ol pilai we i stap aut yet.

Gurias i mekim gutpela wok long ov sisen long kisim ol gutpela pilaia long autsait senta i go long Rabaul na dispela i wok long mekim bikpela senis.

Raun 15 em wanpela bikpela pilai bilong olgeta tim bilong wanem, ol poin bilong ol i stap klostu klostu na ol i mas win long senisim posisen bilong ol.

Long ol arapela Bemobile kap raun 14 pilai, Warriors i memeim Vipers 14-10 long Kundiawa, Mioks i tromoi graun long pes bilong Lahanis 36-30 long Wabag na Rangers i bagarapim sindaun bilong ol Kuris 16-6 long Mosbi.



TENKYU: Mangos (raithan) i kisim presen bilong VAVA na i amamas long gutpela pilai bilong ol.

VAVA amamasim sponsa

VOLIBOL tim bilong Vabukori Amateur Volleyball Association (VAVA) i givim luksave long sponsa bilong ol, Digicel.

Digicel i helpim tim wantaim K25, 000 long go long 2009 nesenel sempionsip long Kokopo, Is Nu Briten provins we VAVA i winim.

Presiden bilong VAVA, John Aiga i tok Digicel i helpim ol long winim dispela tonamen.

“Dispela i soim amamas bilong mipela long sapot bilong Digicel. “Gutpela helpim bilong Digicel i lukim

ol man i winim namba 6 taitol bilong ol long 6-pela yia na ol meri winim namba wan taitol bilong ol,” em i tok.

VAVA i givim wanpela setifiket pepa bilong i luksave na amamas long helpim na sapot bilong Digicel (Certificate of Appreciation).

VAVA i tok dispela i givim luksave tu long sapot bilong Digicel long ol gras-ruts spots insait long PNG.

“Mi amamas long kisim dispela samting long Vabukori volibol asosiesen.

“Yupela i mekim mipela i amamas tru wantaim gutpela pilai bilong yupela long dispela nesenel volibol sempionsip long las yia,” Sif Eksekutiv Opisa bilong Digicel PNG, John Mangos i tok.

“Yupela i ken pilai gut na win gen dispela yia,” em i tok.

VAVA tim bai go long nesenel open na junia sempionsip long Lae long Septemba dispela yia.

Olgeta tim bai pait long winim bek taitol bilong ol.

Namba 11 gren fainol bilong Royals

SPOT RAUN

WANTAIM

Scott Vavine, ML



Tim Morobe wok redi bilong 2012 PNG Gems

TIM Morobe i kisim planti save na tingting long wanpela trening woksop we i kamap long Lae las wik, long helpim ol i statim ol wok redi bilong ol bilong 2012 PNG gems long Kokopo, Is Nu Briten provins.

Menesmen tim bilong Morobe husat i bin kisim tim bilong ol i go long PNG gems las yia long NCD, i bin kamap long dispela trening.

Wanwan man i bilong 20 spot we i bin kamap long dispela gem i kamap long kisim trening las wik.

Namel long ol lain i bin kamap tu em ol bipo biknem spotsman olsem David "Buffalo" Haro, Bami, John Peka, Ludwig Peka na Gidas.

Dispela trening woksop i kamap long tupela hap.

Namba wan hap long moning i lukluk long spots edministresen na namba tu hap long avinun i lukluk long ron bilong tim Morobe insait long PNG gems long 2009.

Namel long 9-pela distrik bilong Morobe, 6-pela tasol i bin kam pilai.

Ol distrik spots edministreta bilong provins tu i kamap long dispela trening.

Bikpela lukluk i kamap long pilai na ron bilong tim Morobe insait long 2009 PNG gems long NCD.

Insait long dispela lukluk, mipela i painim ol hevi na asua we i kamap insait long tim Morobe long dispela taim.

Wanwan manmeri insait long woksop i luksave long dispela ol hevi na i givim sampela tingting long plening komiti long wanem samting ol i bilip i mas kamap long stretim dispel.

Dispela ol tingting bai ken helpim plening Komiti long statim ol wok redi bilong ol nau bilong 2012 PNG Gems.

Edvaisa bilong spots long provins i bin amamas tu long lukim ol i luksave long dispela ol hevi bilong ol na kamapim ol tingting long traime na daunim.

Ol wok we bai kamap insait long ol wok redi bilong tim Morobe em long sait bilong makim menesmen bilong tim, makim bilong ol pilaia, wok redi bilong wanwan tim, painim sponsa na tu bungim mani bilong tim Morobe.

Tasol namba wan samting tru we i mas kamap em long makim ogenaising Komiti na olgeta arapela samting bai bihainim tasol.

Provinsol Edministreta, Mista Tomala i luksave long ol lain husat i kamap long dispela trening na i tok em bai sapotim wok redi bilong ol.

Tingting bilong tim Morobe nau i pas long kisim nambawan ples long 2012 na i laik toksave olsem olgeta wok redi bilong ol long dispela gem i stat pinis.

Bustin Anzu i raitim

CONSORT Express Royals bai mekim 2010 Morobe Ragbi Yunion gren fainol olsem namba 11 bilong ol.

Insait long bikpela (meja) semi fainol long SCRUM pilai graun las wiken, ol i bin winim namba wan birua tim bilong ol, Hornibrook NGI Harlequins 19-13 long go insait long dispela gren fainol we bai kamap long narapela wik antap.

Long liklik (maina) semi fainol, Chem-care Defence i salim Orica Viking Dogs i go bek long stretim ol yet long narapela yia bihain wantaim 19-3 win.

Long ol pilai bilong Anda 19, Harlequins pulim iau bilong Royals na Defence i winim Vikings long liklik (maina)

semi fainol.

Riback Unitech Reds i rausim trausis bilong Bismarck Pirates 17-10 na Harlequins i holim nek bilong Vikings 6-0, long ol arapela pilai.

Dispela pilai namel long Royals and Harlequins i lukim Harlequins i pilai strong tru na bosim bal long planti hap tasol ol polisman i pilai strong moa long winim ol.

Kepten na namba eit, Winston Ninjipa, na tupela sapot pilaia bilong em, Albert Kaupa na Cliff Koi, lok Elias Labi, tupela strongpela fowet, John Karukuru, Simon Oumba na Paul Roana i no givim sans long ol birua bilong ol.

Ol mangi Bumbu Bareks i kisim olgeta strong bilong pilai na mekim ol mangi

long Papua kompaun i kisim taim long holim bal.

Stail plai hap bilong Royals, Sawi Sukumbal, senta Lloyd Bureng na fulbek Neil Wimbi pilai gut long beklain taim ol bikpela fowet bilong ol i wok long brukim banis bilong birua.

Lus fowet, Steven Iko, Billy Ben, fulbek Raymond Tau na winger Wally Kirika i bin mekim olgeta samting long lukim Harlequins i putim sampela trai tasol ol i no inap.

Ol polisman bai kisim gutpela malolo dispela wiken na wetim semi fainols bilong Harlequins na Defence long dispela wiken.

Husat i winim dispela pilai bai bungim ol long narapela fotnait.

Kari go pas wantaim fleg



YANGPELA weitlifita, Steven Kari em namba wan man long karim fleg bilong Papua Niugini go insait long namba wan yut olimpik gems.

Gem i op las wik Fraide na ol tim i stat pilai long Sarere.

Kari em i wanpela tasol bilong PNG husat i winim ples o i kwalifai long gutpela pilai bilong em long go long dispela tonamen.

Em i namba wan man tu bilong PNG long kwalifai long go long dispela ol gem.

Ol narapela i no kwalifai tasol i bin kisim askim long go pilai.

Long Mei dispela yia, Kari winim gol medol long junia divisen na silva long sinia divisen bilong Osenia sempionsip long kwalifai bilong dispela Olimpiks.

Em i winim tupela gol tu long junia na sinia divisen bilong Saut sempionsip.

Yangpela tim we i go pilai wantaim em long Fiji helpim em tu long kwalifai taim ol i bungim olgeta poin bilong ol wantaim.

Dispela ol poin wantaim strongpela pilai bilong Kari lukim em i winim ples insait long yut olimpiks dispela yia.

Long 2009 komonwelt sempionsip, em i bin kam namba 5 ples long sinia divisen namel long 14 pilaia.

Kari bin memba bilong PNG tim i go long 2008 komonwelt gems long Pune, India.

Em i liklik brata bilong sinia meri weitlifita, Rita Kari.

NAMBA WAN MAN: Kari karim fleg bilong PNG long namba wan yut olimpik gems.



S P O T S



Isu 1879

Wan wik: Fonde, Ogas 19 - 25, 2010.

1st
wantok
rate

BEST VALUE CALL RATES

Call Rates from bemobile to bemobile	8am-7pm Day		7pm-8am Night	
	1st minute	after 1 minute	1st minute	after 1 minute
	79t	1t	49t	1t



bemobile *taktok moa*

Muruks i no lus olgeta

Ol tim stap klostu long poin

Busting Anzu i raitim

LUS bilong SBS Muruks long Kokopo long han bilong ol mangi Yauro las wiken i no min olsem ol i lus olgeta.

Ol i gat strong na stail i stap na ol bai kam bek gen. Bikpela samting em ol i tingting long fainols bilong isisen 2010.

Tasol ron bilong ol i go long Wabag long pilaim Toyota Mioks dispela wik em wanpela bikpela samt-

ing we kosa, Jack Kereme i mas lukluk gut long en.

Muruks i bin kisim bikpela bagarap long Agmark Gurias 28-4, dispela em wanpela bikpela lus bilong ol we ol i no save kisim dispela kain skoa lain bipo.

Long ol arapela lus, ol i save skoa na lus tasol dispela em wanpela lus we ol i kisim long ol penolti tasol.

Ol mangi Tolai mas paitim bros na tok ol i rausim ol Muruks long asples bilong ol na mas mekim bikpela pati.

Tasol, Muruks i no lukim dispela lus olsem em bai stopim tingting bilong ol long ron insait long fainols.

Ol i bin kisim bikpela win bilong ol long narapela wik i go pinis na ol i ting ol bai mekim wankain long Kokopo tasol Kalabond pilai graun i gat bikpela stori stap.

Nogat tim i save winim ol Gurias long hap.

Ol Muruks i go pas yet long poinis leda maski ol i lus.

i go moa long Pes 26.

Wokabaut bilong PNG

Dispela Sande bai ol rot long Mosbi pulap gen long bik moning taim ol manmeri bung long stap insait long Trukai Fan Ran (Fun Run) bilong dispela yia.

Wankain samting bai kamap tu long ol arapela ples olsem Hagen Kokopo na Lae.

Planti manmeri na pikinini baim ol Trukai siot bilong ol pinis bai mekim ples i luk yelo olgeta taim olgeta i

wokaut or ron long rot. PNG Sports Federation na Olympic Committee (PNGSFOC) wantaim sapot bilong Trukai Industries i save kamapim dispela pilai long bungim mani bilong salim PNG tim i go long ol bikpela pilai ovasis. Dispela yia bai tim i go long Commonwealth gems long India long Oktoba.

WANTOK POTO.



NISSAN URVAN

DRAIVIM IGO tasol long K69,900

NISSAN SHIFT the way you move



- 3.0 Lita Diesel Engin
- 5 Spid Manuel Transmisen
- Mor Pasindia Hetrum
- Redieta stap wan mita bihain long frant bampa

BOROKO MOTORS

PORT MORESBY PH: 325 5255
LAE PH: 472 1144
MT HAGEN PH: 542 1933
TABUBIL PH: 649 9048

KIMBE PH: 983 5035
MADANG PH: 422 2659
RABAUL PH: 982 8193
Website: www.boroko-motors.com

**Piksa bilong edvetismen tasol.*